

## **Na Surat Pablo Ta Chachi Mamatid Roma**

### *Na Surat Pablo ta Chachi Mamatid Roma*

<sup>1</sup> À saoni Pablo wi mansilfin Jesu Cristu, chinutukanà à man-apostoles ya piniyarà an Apudyus à mangifaka ta Mamfaruy Chamagna.

<sup>2</sup> Na Mamfaruy Chamag Apudyus, impustana ta awi, ad impaisuratna ta chachi profetasna.

<sup>3</sup> Na sachi Chamag, mipangkop ta Anàna wi Aputaay Jesu Cristu. Na kinatatakuna, niyanà ta kanà David, <sup>4</sup> ad na kina-Apudyusna ko, nipaila wi siyan mannakafalini Anà Apudyus ta ummuliyana natakuwan.

<sup>5</sup> Mipakapun Jesu Cristu, inachakuwanà an Apudyus ad chinutukanà à man-apostolesnà umoy mangifaka ta mipangkop an siya ta losani taku ta mamaticha. <sup>6</sup> Ad sachin nitapiyanyu ko, chiayuy mamatid asnati Roma, tan chinutukan Apudyus chiayu kò mamatin Jesus à mantakuna.

<sup>7</sup> Ad siyan annayan surat-un chiayu losan ad asnat wi ay-ayaton Apudyus ya chinutukanà mantakuna.

Sapay kuma ta fadngan chiayu losan an Amatauy Apudyus ya Aputaay Jesu Cristu, ya patar-naoncha kon somsomòyu losan.

### *Na Nanyamanan Pablo An Apudyus*

*1 Cor. 1:4-9; Ef. 1:15-23; Fili. 1:3-11; Col. 1:3-*

<sup>8</sup> Umunaà manyaman an Apudyus mipakapun Jesu Cristu mipangkop an chiayu losan, tan nanchinamag na pammatiyu ta ailiili. <sup>9</sup> Akammun Apudyus wi tuttuwan ifakà, wi siyan mansilfiyà à patingkan na karobfongà wi mangitudtuchu ta Mamfaruy Chamag mipangkop ta Anàna. Siyan akammuna wi nu malluwaruwà, kanayun-u itapi chiayu. <sup>10</sup> Na osay chawatò an Apudyus, nu mafalin, ta iparufusà kuma wi umalid asnat mangilan chiayu. <sup>11</sup> Tan piò isag wi mangilan chiayu, tan awad na itudtuchù an chiayu wi narpu ta Ispiritun Apudyus ta pumigsan pammatiyu. <sup>12</sup> Na piò wi ifaka, man-asisorkagtau ta pumigsan pammatitau.

<sup>13</sup> Susunud, maawatanyu kuman annaya, wi namin-anuy pinuranù wi umali mangilan chiayu ngim natipotipochà. Na piò, umali tudtuchuwan na uchum ad asnat ta mamaticha ko wi isun na nantudtuchuwà ta uchumi foon à Judio ta uchumi ili. <sup>14</sup> Tan sachin impurang Apudyus an saon, ad masapur songfatà an siya nu achì pu oyyoon. Ad sachin isù utang-u ta losani taku ta annay luta, uray naachar ya foon, ya uray chachi machayaw ya foon. <sup>15</sup> Siyan isag-u pion wi umali mangitudtuchu ta Mamfaruy Chamag an chiayu ko ad asnati Roma.

### *Na Karobfongan Na Mamfaruy Chamag*

#### *1 Cor. 1:18, 24*

<sup>16</sup> Sikurachuwà mipangkop ta Mamfaruy Chamag, tan siyan mangifaka ta mannakafalin Apudyus wi manaraknib ta sinumani mamati, wi umunaani wi Judio achiwot ta foon à Judio.

<sup>17</sup> Tan na Mamfaruy Chamag, siyan mangifaka ta inyòoyyan Apudyus wi mangifilang ta takù mamfarun siya. Ya maid uchum à mangifilangana ta takù mamfaru nu achi afus na pammaticha. Tan sachin imfakan na niyugis wi ukudna, wi anana, “Na takuy mifilang à mamfaru an Apudyus kapu ta pammatina, makafiyag an siyà ing-ingkana.”

*Na Kinarawing Na Losani Taku  
Apost. 14:17; 17:24-31*

<sup>18</sup> Nifafagkan amochi og-ot Apudyus ta losani managfasur wi foon pù mamati ya mangwamangwà lawing. Na lawingi oy-oyyooncha, sachin mangipalit ta mamatiyancha ta katutuwaan wi mipangkop an Apudyus. <sup>19</sup> Siyan chuchussaon Apudyus chicha tan narawag met an chichan losani maakammuwan mipangkop an Apudyus, tan inlawag Apudyus. <sup>20</sup> Tan uray achi pu mailà Apudyus, mamàilan kina-Apudyusna ya mannakafalinna wi maid pag-pagna. Tan nanipud ta nangwaana ta luta, narawag na mipangkop an siya, tan na losani iningwana chichan mail-an na mipangkop an siya. Siyan maid pu lasun na takù achicha pu mamatiyan an siya! <sup>21</sup> Ngim uray akammun na takun mipangkop an Apudyus, achicha pu chaya-won à siya, ya achicha pu ko manyaman an siya. Siyan summafalin somsomòchè maid kutùna, ad fummulingot na somsomòcha ingkanà maid pu maawatanchà mipangkop an siya. <sup>22</sup> Na anancha naraingcha, ngim ningningcha! <sup>23</sup> Tan à chicha, inwarangchay manaychayaw ta tuttuway

Apudyus wi matatakù ing-ingkana, ad siya chaychayawoncha chachi iningwan na imachà man-apudyuscha wi sinantakun uchum ya sinansissi-wit ya sinan-animar ya sinan-urog akon uchum.

<sup>24</sup> Siyan kapu ta sachi, winayaan Apudyus chichà mangwa ta farangnay lawing wi pion na long-agcha, siyan maid achicha oyyoon à lawing à mangusarancha ta long-agcha. <sup>25</sup> Na lukin na amaschi, foon pù patiyonchan akam-muchay katuttuwaan wi mipangkop an Apudyus, ad sinukatanchan katuttuwaan wi mipangkop an Apudyus à turtulli. Tan chayawoncha ya patkancha chachi iningwan Apudyus. Ngim afus kumà Apudyus à chaychayawonchà ing-ingkana! Amen.

<sup>26</sup> Siyan kapu ta sachin oyyooncha, winayaan Apudyus chichà mangwamangwa ta sachi lawing ya afafain wi narpu ta pipion na long-agcha. Siyan uray na uchumi fubfufai, mantintinnanungcha wi mangwa ta afafain wi achi pu kuma màwa. <sup>27</sup> Ad uray na uchumi lallarai ko, wi foon à fufain asaw-oncha ngim mantintinnanungchay lallarai. Siyan kaisaw ya afafain na oy-oyyooncha. Siyan machuchusacha kapu ta sachi safali wi oy-oyyooncha.

<sup>28</sup> Siyan kapu ta foon pù patkonchà Apudyus, finayfay-ana chicha, ta oyyooncha kan farangnay foon pu kumà oyyooncha. <sup>29</sup> Siyan maid achicha oyyoon à lawing tan mangkamkamkamcha ya lawingonchan fufuruncha, ya maaposcha ko ya pumappatoycha, ya mansusukobcha ya losancha man-asisilib ya man-asiliud. <sup>30</sup> Ya man-asiukudchà lawing, ya lawingonchà

Apudyus, ya man-iyaaamishan asintatakucha. Ya mamaspas-archa ya mamadpachayawcha, ya am-amchonchay mangwà lawing. Ya achicha pu patkon na chachakkorcha. <sup>31</sup> Maid somsomòchà mamfaru, ya achicha pu oognan na impustacha, ya maid sayaawcha winnu achakucha ta uchumi taku. <sup>32</sup> Chachi taku, uray nu akammucha wi chuchussaon Apudyus à ing-ingkana na losani mangwa ta kakassachi, ipapilitcha ko kay oyyoon. Ya mamfaruwoncha ko chachi uchumi mangwa ta kakassachi.

## 2

### *Maid Pu Makailisi Ta Chusan Apudyus*

#### *Mat. 7:1-5*

<sup>1</sup> Siay mangukum ta kinarawing na uchum, achim anani ilisim na machusaam an Apudyus, uray sinuay taku. Tan nu ukumom na kinarawing na uchum ya iningwam na oy-oyyooncha, siya oyyoom akon machusaam an Apudyus. <sup>2</sup> Ad maaawwatantau wi nalimpiw à Apudyus ta pinagkuisna ta sinumani mangwà lawing. <sup>3</sup> Ngim siay mangukum ta kinarawing na uchum, wi siya kon oy-oyyoom, anam pun nu mailisim na kachusaam an Apudyus? <sup>4</sup> Winnu amsiwom na kinaachakuna ya kinaanusna wi anami pasinsiyaonà sia? Ngim achim pu maawatan wi na pangkop na kinaanus Apudyus, wi pionay fafawiyom na lawingi oy-oyyoom! <sup>5</sup> Ngim natangkin na somsomòyu, siyan chog-achog-am yakan kachusaam an Apudyus ta sachi padcha wi chumatngan na nalimpiw wi

manguisana ta losani takud asnay luta. <sup>6</sup> Tan sikurachuy adchon Apudyus ta losani takun sufalit na iningwacha. <sup>7</sup> Ngim chachi takuy mangipapati wi mangwa ta mamfaru wi mamfaruwan Apudyus an chicha ya makauwaancha ta mannaynayuni fiyag, chichan mangadchan Apudyus ta makafiyakanchan siyà ing-ingkana. <sup>8</sup> Ngim chachi takuy pioncha kan pioncha, wi foon pù iyafainchan ustu tan oyyoonchan sinu-manì lawing wi pioncha, chichan mangipugngoran Apudyus ta og-otna ta manusaanan chicha. <sup>9</sup> Ad sachin mapalikatan ya masikafan na losani takuy mangwà lawing, wi umunan Judio achiwot na foon à Judio. <sup>10</sup> Ngim na losani takuy mangwà mamfaruwon Apudyus, pachayawon Apudyus chicha ya pangatuwona chicha ya patarnaona kon somsomòcha wi umunan Judio achiwot na foon à Judio. <sup>11</sup> Amaschin inyòoyyan Apudyus tan à siya, man-iisuwonan pinagkuisna ta losan, wi maid laksikona.

<sup>12</sup> Chachi foon pù Judio, maid an chichan Lintog Apudyus wi inyug-is Moses. Siyan kuison Apudyus chicha mipangkop ta fasurcha, tan foon pù sachi Lintog na mamfasarana ta manguisanan chicha, tan maid akammucha ta sachi. Ngim losan chachi Judio, inakammuchan sachi Lintog, siyan sachin mamfasaran Apudyus ta manguisanan chicha kapu ta summurngasin-gancha. <sup>13</sup> Tan foon à mamfaruwon Apudyus na taku kapu ta mangngorana kay ta Lintog, ngim na ifilangnà mamfaru na manurutan ta Lintog. <sup>14</sup> Maid akammun na foon à Judio ta Lintog Moses, ngim nu kaspangalikan oyyoonchan

ustu wi intudtuchun na Lintog, sachin mail-ana wi ilasinchana ustu ta somsomòcha, ad sachin miyalig akò lintog wi sursurutoncha. <sup>15</sup> Siyan na mangwaancha ta ustu, sachin mangipaila wi nimura ta somsomòchan ustuy intudtuchun na Lintog. Ad na mallinaan na somsomòcha, sachin manguis an chicha nu lawing winnu mamfarun ingwacha. <sup>16</sup> Siyan sachin oyyoon Apudyus à makuisan na losani taku, tan nu chumatong na sachi Padchana, kuison Jesu Cristu na losani nitataruy somsomò na losani taku wi sachin impaakammun na Mamfaruy Chamag wi iwarwarawag-u.

*Na Judio Ya Kina-Judiocha*

*Gal. 2:15-21; 3:1-14; 5:1-12*

<sup>17</sup> Chiayuy mangwanani Judio-ayu wi takun Apudyus, siya mamfasaranyun nangchonanyu ta Lintog Moses à mitapiyanyun Apudyus ya ipasikatyun nangakammuwanyu ta tuttuway Apudyus. <sup>18</sup> Ad akammuyu kon pion Apudyus à oyyoonyu kuma tan annat na Lintogna wi manudtuchun chiayù mangilasinanyu ta sinuy mamfaruwona. <sup>19</sup> Ad sikurachuayu wi chiayun nginlobfong wi manudtuchu ta chachi isù nakurap wi maid akammucha mipangkop an Apudyus, ad isuayù silaw wi mallawag ta chachi awad ta pangot. <sup>20</sup> Ya ananyu ko wi chiayun awad na karobfongana wi mangamsiw ya manudtuchu ta chachi maid pu akammucha wi isuchà ignorante, tan awad an chiayun sachi Lintog wi siyan maid achiyu akammu ta tuttuway mapati. <sup>21</sup> Naraing-ayuy manudtuchu ta

uchum, ngim achiyu pu tudtuchuwan na long-agyu! Tan na itudtuchuyu wi achitau pu kuma man-akaw, chooyu met man-akaw! <sup>22</sup> Ad na itudtuchuyu ko wi achitau pu managchakas, chiayu met na annan chagchakasna! Ad ananyu koy achita pu chayawon na sinan-Apudyus, ngim apay naturod-ayu nù wi lumnò ta simsimfaancha wi umoy man-akaw ta sinuy michatun an chicha? <sup>23</sup> Siya ipaspas-aryu kon lintog Apudyus wi awad an chiayu, ngim chiayu kon mangifafain an Apudyus ta manurngasinganyu ta lintogna! <sup>24</sup> Tuttuwan sachi niyug-is wi ukud Apudyus wi anana, “Kapu ta oy-oyyoonyuy Judio, sachin manuliyen chachi foon pù Judio an Apudyus.”

<sup>25</sup> Chiayuy Judio, nu tuttuway tungparonyun Lintog Apudyus wi inyug-is Moses, tuttuway misilfin namarkaan na long-agyu wi siyan markayu ta nangifilangan Apudyus an chiayu. Ngim nu surngasingonyun Lintogna, maid pu silfin na namarkaanyu. <sup>26</sup> Tan uray chachi foon à Judio, wi foon pù namarkaan na long-agcha, nu oyyoonchan ustu wi intudtuchun na Lintog, ifilang Apudyus chichà isù namarkaan. <sup>27</sup> Siyan chachi foon pù Judio, uray foon pù mamarkaan na long-agcha wi isun chiayuy Judio, nu oyyoonchan intudtuchun na lintog, chichan mangipaila ta machusaanyuy Judio. Tan chiayuy uchum, uray namarkaan na long-agyu ya awad akon sachi niyug-is wi Lintog an chiayu, foon pù tungparonyu! <sup>28</sup> Tan ilanyu, na mangil-an Apudyus ta Judio, foon à tuttuway Judio na niyanà yakà Judio winnu namarkaan na long-agna. <sup>29</sup> Tan na



tuttuway Judio siyan nafaliwan na kinatatakuna wi foon pù afus na long-agnà namarkaan, tan isù namarkaan na somsomòna. Ad na màwaan na sachi, kapu ta nan-iwaaran na Ispiritun Apudyus an siya wi foon pù kapu ta nan-iwaaran na Lintog. Ad na sachi taku, uray foon à chayawon na takù siya, machayaw an Apudyus.

### 3

<sup>1</sup> Siyan nu amasnat, maid silfin na kina-Judioni nù? Ya maid silfin na namarkaanni ko? <sup>2</sup> Na katuttuwaana, achun silfin na kina-Judion na Judio! Tan na osa, chichan nangipurangan Apudyus ta ukudna. <sup>3</sup> Ngim nu kaspangalikan awad achi pu manungpar ta inukudna. Nu foon à managpatin uchum, siya ko anantaun foon à mapiyar à Apudyus? <sup>4</sup> Foon à mafalin! Tan à Apudyus, uray nu nanturtullin losani takud asnay luta, achi pu mafalin wi manturtulli Apudyus. Tan na niyug-is wi ukudna, anana, “Siay Apudyus, mamàila wi tuttuwa ya nalimpiw na losani ifakam.

Siyan uray sinumani oyyoon na taku  
wi man-anap à arwingam,  
maid pu màchasan tan maid purus ar-  
wingam.”

<sup>5</sup> Mafalini anantauy mamfaru nun fumasuran na taku, tan na kinarawingcha, sachi nun mangi-paila ta kinafarun Apudyus? Mafalini anantauy masaw-à à Apudyus nu chusaonan fummasur? Amaschin ifagfakan na uchum! <sup>6</sup> Ngim foon pù ustun amaschi wi somsomò! Tan nu foon à

nalimpiw à Apudyus, sinun in-inona wi manguis ta losani taku nù?

<sup>7</sup> Ngim mafalini anantau wi nu manturtulliyà, sachi nun mipail-an na kachayawan Apudyus ya mangukuchana ta katuttuwaan? Ad nu maam-amod na kachayawana kapu ta manturtulliyà, achiyà pu kuma chusaon an siya? <sup>8</sup> Siyan na fanag na amaschi wi somsomò, uray fumasufasurtau tan mamfarun lisortana! Ngim kattoi maid kutù na amaschi wi somsomò tan mamparwing. Ngim awad anun uchumi manginsurtun saon wi mangwanani amasnat anun itudtuchù! Siyan chachi taku, sikurachuy machusacha.

*Maid Pu Takù Achi Makafasur*

*1 Juan 1:8-10*

<sup>9</sup> À chiani wi Judio, un-unnoy na kinasasaadni nu chiayuy foon à Judio? Foon! Tan nar-us-u imfaka wi na losani taku, uray na Judio ya foon à Judio, man-iisutauy managfasur. <sup>10</sup> Tan sachin imfakan na niyug-is wi ukud Apudyus wi anana, “Maid pu osà takù mamfaru.

<sup>11</sup> Ad maid pu osà makaawat ta mamfaruwon Apudyus, tan maid osà maryad makafurfurun an Apudyus.

<sup>12</sup> Nan-awichancha losan à Apudyus, siyan nasaw-àcha losan.

Ad maid pu osà mangwa ta ustù.

<sup>13</sup> Maid ustù ukuchoncha tan nauliputan à tuli na chilacha.

Ad isù ochot na urog wi umtoy na ukudcha

wi ifungangay na tupòcha,

<sup>14</sup> ya losan arawag na ukudcha.

<sup>15</sup> Ya alistucha koy mamalikat ya pumatoy ta asintatakucha.

<sup>16</sup> Ad uray sinuy umayancha, kuruwonchan taku ya awad akon chachailoncha.

<sup>17</sup> Kattoi maid pu somsomòchè maitimpuyug ta taku,

<sup>18</sup> ya maid pu ko ogyatchan Apudyus.”

<sup>19</sup> À chitau, akammutau wi na losani niyug-is wi Lintog Apudyus, para ta chachi mamangchon ta Lintogna. Siyan kapu ta sachi Lintog, maid pu lasun na uray sinuy takud asnay lutà achina pu machusaan an Apudyus, tan maid pu osà achi nakafasur. <sup>20</sup> Siyan maid pu takù mifilang à maid fasurna an Apudyus kapu ta manungparana ta Lintog, tan na katuttuwaan, maid pu takù makatungpar ta losani lintog. Tan na puntilyan na Lintog siya ipailana ta takun fummasuranca.

### *Na Mangifilangan Apudyus Ta Takù Maid Fasurchan Siya*

*Gal. 3:1-14; Ef. 2:1-10*

<sup>21</sup> Ngim mamfaru ta sana tan impailan Apudyus na oyyoonay mangifilang ta takù maid fasurchan siya. Na iningwana, foon pù itapinan manungparan ta Lintog wi inyug-is Moses uray imfagfakan na sachi Lintog ya chachi profetas mipangkop ta oyyoon Apudyus. <sup>22</sup> Tan na mangifilangana ta takù maid fasurchan siya, afus na namatiyanchan Jesu Cristu ad sachi. Ad maid pu laksikon Apudyus <sup>23</sup> tan maid pu

osà takù achi nakafasur, siyan maid makàwa ta mamfaruwon Apudyus. <sup>24</sup> Ngim uray sachi, ifilang Apudyus na takù maid fasurchan siya ta nangachakuwana ta losan. Ad iliblina kon achakuna ta taku kapu ta iningwan Jesu Cristu wi nanubfut an chitau. <sup>25</sup> Tan à Jesu Cristu, impaalin Apudyus à siyà natoy wi nifufù na charana, ad sachin namayadna ta fasur na taku, wi sinumani mamatin siya, mapakawan na fasurna. Sachin iningwan Apudyus à mangipailana wi ustustun inyòoyyana. Tan ingkana ta sana, inan-anusanan fummasuran na taku ta nangachakuwanan chitau. <sup>26</sup> Ngim na sana, na mail-ana wi ustustun inyòoyyana, masapur machusan fasur, siyan sachin nangipaaliyanan Jesu Cristu à mamayad ta losani fasur, tapnu sinumani mamatin Jesus ifilang Apudyus à siyà maid fasurna.

<sup>27</sup> Siyan maid pu mafalin à ipaspas-artau. Mifilangtaù maid pu fasurtaun Apudyus kapu ta nanungparantau ta Lintog? Foon! Tan foon à kapu ta mamfaruy oy-oyyoontaun mangakseptaran Apudyus an chitau ngim mipakapu kay ta mamatiyantaun Jesu Cristu. <sup>28</sup> Siyan maila wi na mangifilangan Apudyus ta takù maid fasurnan siya, mipakapu kay ta mamatiyanan Jesu Cristu wi foon à manungparana ta Lintog. <sup>29</sup> Tan à Apudyus, foon pu kà chiani wi Judio na somsom-ona tan somsom-ona ko chachi foon à Judio tan man-iisuwonan losani taku. <sup>30</sup> Os-osàan à Apudyus, siyan man-iisuwonan oyyoona ta Judio ya foon à Judio. Tan na mangifilangana ta Judio ya foon à Judio à maid fasurchan siya,

kapu ta namatiyanchan Jesu Cristu. <sup>31</sup> Siyan nu amasnat, maid nù silfin na Lintog? Foon, tan na mamatiyantaun Jesu Cristu, sachin manutuwaantau ta Lintog.

## 4

### *Na Niyalikan Abraham*

*Gal. 3:16-29; 4:21-31*

<sup>1</sup> Sinun maukud nù ta mipangkop an Abraham wi nginkanà an chitauy Judio? <sup>2</sup> Tan akammutau wi foon à kinafarunan nangifilangan Apudyus an siyà mamfaru. Tan nu maid fummasurana, mafalini ichayawnan amaschi. Ngim kapu ta fummasur, foon à mafalini ipachayawna an Apudyus na sinumani iningwanay mamfaru. <sup>3</sup> Tan na niyug-is wi ukud Apudyus, anana, “Pinatin Abraham na inukud Apudyus, ad sachin nangifilangan Apudyus an siyà mamfaru.”

<sup>4</sup> Nu ifilang Apudyus na takù mamfaru an siya kapu ta mamfaruy ingwacha, isù natangchanan na sachi taku, wi foon à liblin maatod an siya tan isù illabfuna. <sup>5</sup> Ngim foon à amaschin inyòoyyan Apudyus wi mangifilang an chitaù mamfaru. Tan à Apudyus, mipakapu kay ta achakuna iliblinan mangifilangana ta takù maid fasurnan siya. Siyan achitau pu mamfasaran na nangwaantau ta mamfarù mamfaruwan Apudyus an chitau, ta siya piyarontaù Apudyus ta ifilangna chitaù mamfaru. <sup>6</sup> Uray à Ali David ta awi, amaschin anana ta nangukuchana ta lagsak na takuy imfilang Apudyus à maid fasurna wi mipakapu

ta pammatina wi foon pù kapu ta iningwanay mamfaru. Na sachi inyug-is David, anana,

<sup>7</sup> “Amod na lagsak chachi takuy  
pinakawan Apudyus na lawingi iningwana,  
ad inaannan kachusaan na fasurna!

<sup>8</sup> Isag naragsakan à siya  
tan foon à oognan Apudyus na fasurna,  
tan imflangnà siyà maid fasurna!”

<sup>9</sup> Na sachi lagsak wi inukud David, para kay ta chachi Judio wi namarkaan na long-agcha? Foon, a! Tan nitapi ko chachi foon à namarkaan. Tan somsom-ontau, wi na nangifilangan Apudyus an Abraham à mamfaru, kapu ta namatiyana kay ta inukud Apudyus, <sup>10</sup> uray foon pù namarkaan à Abraham, tan chaan pù mallukin mamarkaan na taku. <sup>11</sup> Tan na sachi marka, ummun-unud à isù singyar na nangifilangan Apudyus an Abraham à mamfaru kapu ta namatiyana ta inukud Apudyus. Ad sachin naawakan Abraham à pinakaaman na losani takuy ifilang Apudyus à mamfaru kapu ta mamatiyancha ta imfakana, uray nu foon à mamarkaan na long-agcha. <sup>12</sup> Ad siya kon pinakaaman na losani namarkaan wi foon pu kà long-agchan namarkaan, tan patiyoncha kon inukud Apudyus wi isun akon namatiyan Abraham ta sachi chaanna pu mamarkaan.

*Chachi Mamatin Apudyus, Chichan Mangipurangana Ta Impustana*

<sup>13</sup> Iningkaw na impustan Apudyus an Abraham ya losani kanàna wi à tapin na padcha chichan manawid ta losani awad ad asnay luta. Na

nangipustaan Apudyus ta sachi an Abraham, foon à kapu ta nanungparana ta Lintog ngim kapu ta namatiyana ta losani inukud Apudyus. Ad na namatiyan Abraham, sachin nangifilangan Apudyus an siyà mamfaru. <sup>14</sup> Tan nu afus yakan manungparan ta Lintog na ustuy mangawatan ta impustan Apudyus, kattoi maid filang na pammati, ad siyan achin pun na impustan Apudyus tumuruyan tan maid pu makatungpar ta losani Lintog. <sup>15</sup> Tan na Lintog, sachin mamfasaran wi chuchussaon Apudyus chitau tan sinurngasingtau. Ngim nu maid lintog, maid pu sinurngasingtau.

<sup>16</sup> Ad siyan maawatantau wi na impustan Apudyus wi adchona, illiblinay nangatod ta losani mamati ta inukudna, wi na nangilibliyana ta impustana, ta awad mail-an na achakuna, ya ta masikurachu wi awaton na losani tuttuway kanà Abraham. Ad na losani mifilang à tuttuway kanàna, foon pù afus na Judio wi mamangchon ta Lintog, tan uray na sinumani mamatin Apudyus wi isun na namatiyan Abraham. Tan à Abraham, siyan pinakaamatau losan wi mamati, <sup>17</sup> wi sachin imfakan na niyug-is wi ukud Apudyus, wi anana, “Namfalinò sià pinakaaman na ad-adchuwani taku ta mansafasafali wi ili.” Sachin anan Apudyus, tan na mangil-ana, kanà Abraham na losani taku wi mamati wi isun na namatiyan Abraham. À Apudyus, siyan mannakafalin wi manaku ta natoy ya mangwa ta piona wi uray ifakana kay ad mawa wi maid lukina.

<sup>18</sup> À Abraham, pinatinan imfakan Apudyus

an siya uray isù achi pu mafalini màwa, ad siyan nginkanà ta ad-adchuwani taku ta ailiili, wi na aachucha, isù aachun na fituwon ta langit, wi sachin imfakan na niyug-is wi ukud Apudyus wi màwa. <sup>19</sup> Ad uray narakarakay à Abraham, foon à kummapsut na pammatina uray na namnammoana ta kinarakaychan Sara wi man-asawa. Tan na sachi timpu, chanchani singkasut na tawon Abraham ad maid pu anàcha tan fasig à Sara. <sup>20</sup> Ngim foon pù nanchuwachuwani somsomò Abraham mipangkop ta sachi impustan Apudyus an siya, ngim pummigpigsan pammatina ad nanyaman an Apudyus ta nanayawanan siya, <sup>21</sup> tan sinikurachuna wi oyyoon Apudyus na impustana. <sup>22</sup> Ad sachin nangifilangan Apudyus an siyà mamfaru, tan pinatina wi tuttuwan sachi impustan Apudyus an siya. <sup>23</sup> Ad na sachi ukud wi anana, “Imfilang Apudyus à Abraham à mamfaru,” foon à afus na para an Abraham na niyug-isana, <sup>24</sup> tan niyug-is à para kon chitau losan ta sana. Tan uray chitau, ifilang ako Apudyus chitaù mamfaru nu mamatitaun siya, wi siyan nangipauli nanaku an Aputaury Jesu ta natayana. <sup>25</sup> Ad à Jesu Cristu, innadchon Apudyus à siyà matoy à mamayadna ta fasurtau, ad nipauli natakù mifilangantaù maid fasurtaun Apudyus.

## 5

*Na Mangifilangan Apudyus Ta Takù Maid Fasurchan Siya*

*Col. 1:21-23; Jaime 1:2-8; 2 Ped. 1:3-11*



<sup>1</sup> Siyan à chitauy nifilang à maid fasurtaun Apudyus kapu ta pammatitau, nitimpuyugtau an Apudyus kapu ta iningwan Aputauy Jesu Cristu. <sup>2</sup> Ad mipakapu ko ta pammatitau, mitapitau ta achakun Apudyus wi linaontau ko ta sana. Siyan lumagsaktau kapu ta namnamatauy mitapi ta kachayawan Apudyus! <sup>3</sup> Ad lumagsaktau ko kapu ta liglikattau, tan akammutau wi nu anu-santaun likat, siyan pumigsaan na somsomòtau ta achitau pu maafak nu awad uchum à likat. <sup>4</sup> Ad na pumigsaan na somsomòtau, sachin mangapufaran Apudyus an chitau. Ad nu apufaran Apudyus chitau, sachi kon mannamnaantauy makauwa ta chachi adchonà tapin na padcha. <sup>5</sup> Ad foon pù machismayan awad namnamaonan Apudyus, tan amod na ayat Apudyus an chitau, wi na mifasarana, na nangadchana ta Ispiritunà makarong-ag an chitau.

<sup>6</sup> Na mail-an na amochi ayat Apudyus an chitau, tan uray maid pu karobfongantau wi marnarakhnib ta long-agtau kapu ta fasurtau, natoy à Cristù subfuttauy managfasur ta chummatngan na ustuy timpu. <sup>7</sup> Nalikat à awad mangiyatoy à masarakhnifan na osay mamfaruy taku. Mafalin nin wi awad mangiturod mangiyatoy à masarakhnifan na furunnay ay-ayatona. <sup>8</sup> Ngim à Apudyus, maid pu miyisuwan na ayatna wi impailanan chitau, tan uray nu managfasurtau, innadchonà Cristù matoy à subfutttau! <sup>9</sup> Ad nu ifilang Apudyus chitau maid fasurtaun siya kapu ta natayan Jesu Cristu wi nifufù na charanà para an chitau, sikurachuy sarakhnifana ko chitau ta

og-ot Apudyus wi manusa ta losani taku tapin na padcha! <sup>10</sup> Tan somsom-ontaun annaya, wi na chamu, tuttuway afusur chitaun Apudyus kapu ta fasurtau. Ngim uray amaschi, inulin Apudyus chitaun mamfurunna kapu ta natayan na ananay Jesu Cristu. Ad kapu ta namfurunna chitau, sikurachuy masarakhifantau kapu ta asin natakun anana! <sup>11</sup> Ad foon pu kò afuschi, tan tuttuway pinaragsak Apudyus chitau kapu ta iningwan Jesu Cristu wi siyan nangwa nifurnantaun Apudyus.

### *Na Niyalikan Jesu Cristu An Adam*

#### *1 Cor. 15:21-28*

<sup>12</sup> Na chamu, os-osàani takun fummasur wi siyan ummunay taku. Ad na lisortan na sachi fasurna, otoy. Ad sachin nitapiyan na losani takud asnay luta wi matoy tan maid pu osà achi pu fummasur. <sup>13</sup> Ad uray na chaan pu Apudyus nangadchan ta Lintognan Moses, nar-us fummasur na taku, ngim maid pu mangifaka wi fasurchachi tan maid pun yan lintog à mamfasaran wi awad sinurngasingcha. <sup>14</sup> Ngim nanipud an Adam ingkanan Moses natoy na losani taku tan tinawidchan matayan, wi uray nansabsafalin fasurcha, isun na fasur Adam.

À Adam, siyan miyalikan na umali wi siya Jesus. Tan à chichay chuwa, iningkaw na iningwacha wi nitapiyan na losani taku. <sup>15</sup> Ngim nansafalin lisortan na iningwachay chuwa, tan foon à miyisun fummasuran chi osa ya mangaanan ta fasur chi osa. Tan somsom-onyu, wi na lisortan na fummasuran Adam wi os-osàani taku,

iningwanan matayan na losani taku. Ngim sinumisag na kinapigsan na achakun Apudyus, tan na lisortan na iningwan Jesu Cristu, siya iningwanan maaanan na fasur na losani taku kapu ta achakuna wi siyan fachang Apudyus wi iliblina ta taku. <sup>16</sup> Ad maila ko wi tuttuway nansafalin lisortan na fummasuran Adam ta sachi libli wi imfachang Apudyus. Tan na sachi os-osàani fummasur, innadchonon chitaun machusaantau losan. Ngim na adchon na sachi libli wi imfachang Apudyus an chitau, uray ad-adchuwan na fasurtau ifilangna chitaù maid fasurtaun siyà achitau pu machusaan! <sup>17</sup> Siyan simfumarun iningwan na sachi os-osàani Jesu Cristu nu iningwan na sachi os-osàani Adam! Tuttuway nisapasap na sachi fummasuran Adam ta losani takù matayancha losan. Ngim losani takuy mangawat ta amochi achakun Apudyus à mifilanganchà mamfaru, makafiyagchan Apudyus à ing-ingkana ya makaturaycha kon siya.

<sup>18</sup> Siyan na lisortan na sachi os-osàani fasur wi iningwan Adam siyan machusaan na losani taku. Ngim na lisortan na sachi os-osàani afaruwani iningwan Cristu siyan mifilangan na losani taku an Apudyus à maid fasurcha wi sachin makafiyakanchan siyà ing-ingkana. <sup>19</sup> Siyan maila wi kapu ta sachi foon pù pinumtokan na sachi os-osàani taku, siyan nisapasap wi managfasur na losani taku. Ngim kapu ko ta pinumtokan na sachi osa, mafalini mifilang na losani takù mamfaru an Apudyus.

<sup>20</sup> Na nangadchan Apudyus ta Lintog, ta umachuachun makafasuran. Ngim uray nu

machogchog-an na fumasuran na taku, maamamod na achakun Apudyus wi mamachang an chicha. <sup>21</sup> Tan na chamuna, fasur na mangituray ta taku wi siyan matayancha. Ngim na sana, achakun Apudyus na mangituray wi sachin mangifilangan Apudyus an chitaù mamfaru kapu ta nitipunantaun Aputauy Jesu Cristu wi sachi kon makafiyakantaun siyà ing-ingkana.

## 6

*Na Nakàtoy An Jesu Cristu Siyan Makafiyag Akon Siya*

*2 Cor. 5:14-15; Gal. 2:19-21; 3:26-27; Col. 2:11-3:11*

<sup>1</sup> Tuttuway maid pu miyisuwan na achakun Apudyus an chitau. Ad, sinu kon anantau nù! Iturturuytauy fumasur ta machogchog-an na achakun Apudyus an chitau? <sup>2</sup> Foon pun! Tan ituruy na natoy na ining-ingwana ta chaanna pu matayan? À chitauy isù nakàtoy an Jesu Cristu, ituruytaun sachi tinaynantau?

<sup>3</sup> Tan inaagkammutau wi awad na pion na nafunyakantau wi isingyar. Tan na insingyarna siyan nilamyungantaun Jesu Cristu ta natayana.

<sup>4</sup> Siyan na nafunyakantau, nilamyungtaun Jesu Cristu ta natayana ya nilobnana ko. Ad maatod an chitaun faruy fiyag wi isun na nàwan Jesu Cristu ta nipauliyana natakuan mipakapu ta mannakafalin Amatauy Apudyus.

<sup>5</sup> Siyan kapu ta nilamyungtaun Jesu Cristu ta natayana, sikurachu koy milamyungtaun siya ta ummulyana natakuan, siyan asintau matakuan

wi isun na natakuwana. <sup>6</sup> Siyan maawatantau kuma wi na chachaani kinatatakutau, sachin nakàtoy an Jesu Cristu ta sachi kros ta awad maafakan na lawing wi nisikud an chitau, ya ta achi chitau ko mansaniluwon ta fasur. <sup>7</sup> Tan nu matoy na taku, sachin milufusana ta karobfongan na fasur wi manturay an siya.

<sup>8</sup> Ad kapu ko ta nakàtoytaun Jesu Cristu, sachin mamatiantau wi makafiyagtau kon siyà ing-ingkana. <sup>9</sup> Ad akammutau ko wi kapu ta ummulyan Jesu Cristu natakuwan achi pu mafalin wi asin ako matoy, tan pinagpagnan matayan à ing-ingkana, wi isù inafakna. <sup>10</sup> Na natayana, umanay à mamayadna ta fasurtaù ing-ingkana. Ad kapu ta ummulyana natakuwan, matatakù ing-inganà machayawan Apudyus. <sup>11</sup> Siyan chitau ko, masapur ifilangtaun long-agtaù isù nanattoy mipangkop ta karobfongan na fasur wi manturay an chitau ya natataku an Apudyus kapu ta nailamyungantaun Jesu Cristu.

<sup>12</sup> Siyan achitau pu kuma iparufus na manturayan na fasur ta long-agtau ta achitau pu patkon na lawingi pipion na long-ag. <sup>13</sup> Ya achitau pu ko itay-un uray sinumani partin na long-agtaù mausar à mangwa ta lawing. Isù nanattoytau an Apudyus ta sin-arkawan kapu ta fasurtau, ngim innadchon Apudyus na faruy fiyagtau, siyan na oyyoontau, adchontaun losani long-agtau an siya ta usaronay mangwa ta mamfaruwona. <sup>14</sup> Tan achi pu kuma mafalin wi fasur na mangituray an chitau ta sana. Tan na achakun Apudyus na mangituray an chitau ta sana wi foon à sachi lintog na manturay.

*Na Papattiyontau Siyan Nginsanilun Chitau*  
*Rom. 8:1-17*

<sup>15</sup> Nu kaspangalikan awad mangwanani, nu foon pù lintog na mangituray an chitau, achifali uray nu fumasufasurtau ta ikad yakan achakun Apudyus wi maningngil an chitau! Ngim achi pu màwan sachi! <sup>16</sup> Tan foon pù maawatantau wi uray sinuy mangadchantau ta long-agtau sachin isù nginsanilun chitau? Siyan nu Satan na mangadchantau, siyan nginsanilun chitau, ad na lisortana, matayan ya mifalluwan. Ngim nu Apudyus na mangadchantau, siyan nginsanilun chitau, ad na lisortana, iflangna chitau maid fasuretaun siya. <sup>17</sup> Siyan manyamantaun Apudyus! Tan na chamu, isù sanilun Satan chitau. Ngim na sana, tuttuway ipapatitauy mamtog ta sachi katuttuwaan wi nitudtuchun chitau. <sup>18</sup> Nilufusayu ta kinasaniluyu ta fasur ad namfalimon Apudyus chiayù isù saniluna wi mangwa kay ta ustu.

<sup>19</sup> (Siya usarò na maawatanyuy ug-ugkud mipangkop ta sanilu ta mallasun mangawatanyu kuma ta annayay piò wi ukuchon.) Na sin-arkawan, intay-uyun losani long-agyù nansaniluy mangwa ta sinumani lawing ya akaisawani oy-oyoon. Siyan na sana, amaschi kuman oyyoonyuy mangitay-u ta losani long-agyù mansaniluy mangwa ta ustuy mamfaruwon Apudyus.

<sup>20</sup> Na sin-arkawani saniluayun Satan, maid pu somsomòyù mangwa ta ustuy mamfaruwon Apudyus. <sup>21</sup> Ad sinun kunkunayuy nangwanangwa ta amaschi wi siyan mafainanyu

ta sana? Tan na lisortan na amaschi oyyoon, matayan ya misinaan an Apudyus à ing-ingkana! <sup>22</sup> Ngim na sana, nasaraknifan-ayu ta kinasaniluyun Satan, siyan à Apudyus na nginsanilun chiayu. Ad na makunkunaanyu ta sana, namfalinona chiayù takuy mamfaruwona wi na lisortana makafiyakanyun siyà ing-ingkana. <sup>23</sup> Tan na fayad na fasur siyan matayan wi misinaan an Apudyus à ing-ingkana. Ngim na iliblin Apudyus siyan makafiyakan an siyà ing-ingkana kapu ta nilamyungantaun Aputaay Jesu Cristu.

## 7

### *Na Misiyanantau Ta Lintog*

*Rom. 7:39; Gal. 2:19-20*

<sup>1</sup> Susunud, akammù wi maawatanyun anchanayay ifakà tan akammuyu met na mipangkop ta lintog wi atattakun yakan takun manitingngilana. Ngim nu kaspangalikan matoy na osay taku, sachin mapagpakan na manitingngilan na lintog an siya. <sup>2</sup> Isun na manasawa, wi nu nangasawan fufai, ipalit na lintog na mangisiyananan asawana asinna mangasawan à safali ingkanà matoy. Ngim nu kaspangalikan matoy na asawana, niparufus na sachi fufai ta sachi lintog, ad miparufus akoy asin mangasawa nu piona. <sup>3</sup> Ngim nu kaspangalikan nakasuyop na fufai ta safali wi larai wi awad na sikuchi asawana, sachin tuttuway ananchay nakachagchakas. Ngim nu nar-us natoy na asawana, foon pù sachi lintog na maningngil

an siya tan foon à makachagchakas nu asin mangasawa.

<sup>4</sup> Ad isuna kon chiayu, susunud, wi matayan na mansiyanan na man-asawa, siyan isun akon matayan na misiyananyu ta lintog. Tan chiayu, nakàtoy-ayu met an Jesu Cristu ta natayana, siyan achi pu mafalin wi na sachi lintog na manitingngil an chiayu ta sana. Tan safalin nitapiyantau, tan nilamyungtaun Jesu Cristu wi ummuli nataku ta natayana. Siyan na sana, nawayatau wi mangwa ta pion Apudyus. <sup>5</sup> Na sana, foon kumà isun na chamuy sursuruton-taun sikuchi pion na long-agtau. Tan na chamu, chinog-an na Lintog na ayattaury mangwa ta lawing, tan uray sinumani ipalit na Lintog sachi kon piontaury oyyoon wi na lisortana matayan wi misinaan an Apudyus à ing-ingkana. <sup>6</sup> Ngim na sana, naiparufustau ta sachi Lintog wi ngin-sanilun chitau, tan mipakapu ta nakàtoyantaun Jesu Cristu siyan niparufusantau ta sachi Lintog. Siyan na sanay mansilfiyantaun Apudyus, foon à sachi Lintog na manitingngil an chitau ngim Ispirituna.

### *Ipakaawat Na Lintog Na Fasur*

#### *Gal. 2:15-21*

<sup>7</sup> Nu kaspangalikan awad mangwanani, nu amasnat, lawing na Lintog tan siyan nangwà fummasuran! Ngim foon, tan nu maid pu Lintog, foon à maawatan nu sinun fasur. Tan nu maid pu Lintog à mangifakay, “Achia mangkamkam ta uwan na uchum,” foon à illasin-un kinarawing na mangkamkam wi awad an saon. <sup>8</sup> Ngim



kapu ta iningkaw na sachi Lintog wi mangipalit ta mangkamkam, sachin nangiparoswa ta mangkamkam wi awad an saon. Tan nu maid na Lintog, maid ilasin à fasur. <sup>9</sup> Isun na chaanu pu nangakammuwan ta sachi Lintog, anà pun nu mamfaruwà wi maid fasur-u. Ngim na naawatà ta imfakan na sachi Lintog, naawatà akoy managfasurà, <sup>10</sup> ad karobfongà wi matoy ya misina an Apudyus à ing-ingkana. Siyan na sachi Lintog wi piniyar-ù mamiyag an saon, sachi kon nangifaka ta matayà. <sup>11</sup> Siyan sinikapanà ta fasur wi nisikud an saon, tan siyan nangawis an saon wi summurngasing ta sachi Lintog, wi na lisortana matayan wi misinaan an Apudyus.

<sup>12</sup> Ad siyan, naapudyusan na Lintog ya uray losani filinna, tan mamfaru ya ustun itudtuchuna. <sup>13</sup> Siyan pafasurò na Lintog tan siyan nangwa ta matayà à misinaà an Apudyus à ing-ingkana? Achi pu mafalin, tan na fasur wi awad an saon, sachin nangwà misinaà an Apudyus. Ad kapu ta sachi imfakan na Lintog wi masapur matoyà, sachi Lintog na mangipaakammu ta mipangkop ta fasur ya mipangkop ta kinarawingna.

### *Maid Pu Takù Makàwa Ta Ustu*

<sup>14</sup> Akammutau wi na Lintog, naapudyusan tan Apudyus na narpuwana. Ngim chitauy taku, nisisikud an chitaun fasur wi isutaù sanilun na fasur. <sup>15</sup> Isun saoni achì pu maawatan na annay long-ag-u, tan na mamfaruy piò wi oyyoon, sachin achì pu oyyoon! Ngim na lawingi lawingò wi oyyoon, sachin oyyoò! <sup>16</sup> Ad nu siya oyyoò

na lawingò, sachin manuttuwaan wi tàchorà na kinaustun na Lintog. <sup>17</sup> Siyan mafalini ifakà wi foon à saon na mangwa ta lawing, tan mipakapu ta fasur wi nasisikud an saon, sachin mangimanchar ta mangwaà ta lawing. <sup>18</sup> Tan akammù wi maid mamfarù nisisikud ta annay long-ag-u. Tan uray nu piò wi mangwa ta mamfaru, achiyà pu makàwa. <sup>19</sup> Siyan tamako achiyà pu makàwa ta mamfaru wi piò nù? Ad na lawing wi lawingò, tamako sachin oy-oyyò? <sup>20</sup> Siyan nu oyyò na lawingò wi oyyoon, kapilitani foon à saon na mangwa, tan na fasur wi nisisikud an saon sachin mangimanchar.

<sup>21</sup> Siyan na maawatà ta annay matakulantau, nisikud wi nu piò wi oyyoon na mamfaru, siya màwan lawing. <sup>22</sup> Amod na ayat na somsomòu wi mangwa ta pion Apudyus, <sup>23</sup> ngim maid mafalin-u. Tan na fasur wi nisisikud ta annay long-ag-u, siyan manipod ta ayat na somsomòu wi mangwa ta pion Apudyus. Siyan isù imfifaruchà ta fasur wi mangituray an saon. <sup>24</sup> Siyan kakkaasiyà, tan sinun nginlobfong wi manaraknib an saon ta annay kinasanilù ta fasur wi misinaà an Apudyus? <sup>25</sup> Siyan manyamanà an Apudyus tan siyan afusi makafachang an saon kapu ta iningwan Aputauy Jesu Cristu!

Siyan nu mipangkop an saon, uray nu chumtong na fumasuran na annay long-ag-u, ipapatin na somsomòuy mangwa ta pion Apudyus.

## 8

*Ispiritun Apudyus Na Mamaliw Ta*

*Kinatatakun Na Taku*

*Juan 3:1-8; Rom. 6:15-23; Gal. 5:16-26; Heb. 10:1-5*

<sup>1</sup> Siyan na sana, losantauy nilamyung an Jesu Cristu, sikurachuy achitau pu machusa. <sup>2</sup> Tan na Ispiritun Apudyus siyan mangituray an chitau ta sana, wi à siya, mipakapu ta nilamyungantaun Jesu Cristu, finaliwanan fiyagtau ta nangadchana ta faruy fiyag. Ad imparufus chitau ta manturayan na fasur ta sana wi siya lisortana mifalluwan. <sup>3</sup> Siyan tuttuway foon à nanurutan ta Lintog na nangwà masaraknifantau, tan kapu ta kinakapsuttauy taku, maid pu makasurut ta sachi. Ngim à Apudyus, siyan nangwa ta masaraknifantau, wi impaalinan anàna wi namfalin isutauy takuy managfasur, ngim na karasina kay, maid pu fasurna. Ad siyan chinusan Apudyus à mamayadna ta fasurtau ta foon à fasur na mangituray an chitau ta sana. <sup>4</sup> Amaschin iningwan Apudyus ta masurut na losani Lintog. Ad iningwanan sachì fumaruwantau wi manurut ta pion na Ispiritun Apudyus wi foon à pion na long-ag. <sup>5</sup> Tan na takuy manurut ta sikuchi pion na long-agna, maid uchum à mammanchar an siya nu achi afus na pipion na long-agna wi nisisikud ta taku. Ngim na takuy manurut ta pion na Ispiritun Apudyus, Ispiritun mammanchar an siya. <sup>6</sup> Nu pion yakan long-ag na mammanchar an chitau, misinataun Apudyus à ing-ingkana. Ngim nu Ispiritun Apudyus na mammanchar an chitau siyan tumarnaan na somsomòtau ya makafiyakantaun Apudyus à ing-ingkana. <sup>7</sup> Siyan chachi manurut yakay ta

sikuchi pipion na long-agcha, chichan afusur Apudyus tan foon pù surutonchan pion Apudyus. Ad na katuttuwaan, achicha pu makasurut ta sachi, <sup>8</sup> tan na takuy surutonan sikuchi pipion yakan long-agna, achi pu mafalini oyyoonan mamparagsak an Apudyus.

<sup>9</sup> Ngim safali an chitau, tan foon pù sikuchi pipion na long-ag na mangituray an chitau, tan Ispiritun Apudyus na mangituray nu tuttuway nakarong-ag an chitau. Tan sinumani takuy maid na Ispiritun Cristu an siya, foon à takun Cristu. <sup>10</sup> Ngim nu tuttuway awad à Cristun chitau, uray nu matoy na annay long-agtau kapu ta fasur, mafiyagtau mipakapu ta Ispiritun Apudyus tan imfilang Apudyus chitau maid fasurtaun siya. <sup>11</sup> Ad nu tuttuway nakarong-ag na Ispiritun Apudyus an chitau, à Apudyus wi nangipauli nanaku an Jesu Cristu, ipaulina ko takuwon na annay long-agtau mipakapu ta Ispirituna wi nakarong-ag an chitau.

<sup>12</sup> Siyan, susunud, masapur iyafaintaun pion Apudyus ta foon à sikuchi pipion na long-ag na oy-oyyoontau. <sup>13</sup> Tan nu sikuchi pipion na long-ag na sursurutontau, siyan misinaantaun Apudyus à ing-ingkana. Ngim nu awatontaun fachang na Ispiritun Apudyus à mangiyakayantau ta sikuchi pipion na long-ag, makafiyagtaun Apudyus à ing-ingkana. <sup>14</sup> Tan losani takuy Ispiritun Apudyus na mangituray an chicha, chichan tuttuway an-ananà Apudyus. <sup>15</sup> Ad na Ispiritun Apudyus wi innadchonon chitau, foon à mansaniluwon chitau à umogyatantaun

Apudyus, ngim mamfalinon chitaù an-ananà Apudyus. Ad kapu ta karobfongan na Ispiritun Apudyus, siyan mangawakantaun Apudyus, Ama! <sup>16</sup> Ad na Ispiritun Apudyus, siyan mangipalinan chitau wi tuttuway an-ananà Apudyus chitau. <sup>17</sup> Ad kapu ta an-ananà Apudyus chitau, sikurachuy tawichontaun sachi tawid wi adchona ta losani takuna. Ya makatawidtau ko ta losani innadchonon Jesu Cristu. Tan nu mitapitau ta likat Cristu, sikurachuy mitapitau ko ta machayawana.

*Na Machayawantaù Tapin Na Padcha*  
*2 Cor. 4:17-18; 2 Ped. 3:10-13*

<sup>18</sup> Nu som-osom-ò na losani maliglikatantau ta annay luta ta sana, akammù wi maid miyisuwan na kinafarun na màwan chitaù tapin na padcha. <sup>19</sup> Ad uray na losani iningwan Apudyus ad asnay luta, uullayoncha kan padchay mangiparangan Apudyus ta kinangatun na an-ananàna. <sup>20</sup> Tan na losani iningwan Apudyus, foon à nituruy na puntus Apudyus wi nangwa tan nitapicha losan ta fummasuran na taku, tan sachin simsimmò Apudyus à màwa. Ngim anna ko kan manamnama, <sup>21</sup> wi à tapin na padcha, fumarun losani iningwan Apudyus ya masaraknifancha ko ta matayancha ya marposancha. Ya makatawidcha losan ta farfaruy fiyag wi adchon Apudyus ta an-ananàna. <sup>22</sup> Tan akammutau wi ingkana ta sana losani iningwan Apudyus manliglikatchà isun na manlikatan na umanà. <sup>23</sup> Ad foon pu kò afus chachi amaschi, tan uray ako chitauy

naadchan à Ispiritun Apudyus à manuttuwaan-tau ta losani adchonon chitaù tapin na padcha. Maliglikatantau wi manguullay ta mangifilangan Apudyus an chitaù mismuy anàna ya sachi kon mamaliwana ta long-agtaù achi pu asin matoy. <sup>24</sup> Tan namnamataun nasaraknifantau, ngim nu siya namnamaontaun ilantau foon pù tuttuway namnama. Tan sinun mannamnama ta ilana? <sup>25</sup> Siyan kapu ta chaan pù chumatong na namnamaontaun, masapur an-anusantau uullayon.

<sup>26</sup> Ad na Ispiritun Apudyus wi awad an chitau, fadngana ko chitau ta kinakapsuttau. Tan uray na malluwaruwantau maid akammutau ta ustuy ifakataun Apudyus. Siyan nu achitau pu makaifaka ta mifaka kapu ta achagson na simsimòtau, na Ispiritun Apudyus siyan mangipachakus ta sachi achitau pu makaifaka. <sup>27</sup> Ad à Apudyus wi nangaagkammu ta som-somòtau, maawatana kon chawat na Ispirituna, tan na mangiluwaruwan na Ispiritunan chitau, iyunudna ta pion Apudyus à para an chitau.

<sup>28</sup> Siyan chitauy tuttuway mangay-ayat an Apudyus, wi piniliyanà mangwa ta puranuna, akammutau wi uray sinun mawan chitau, fumaruwantaun lisortanan Apudyus. <sup>29</sup> Tan nanipud ta chamun na sinuman, inaagkam-mun Apudyus nu sinun mamatin siya, siyan piniliyana chichà miyisun Jesu Cristu wi anàna, ta umachuchay mansusunud wi à Jesu Cristun pangurun chicha losan. <sup>30</sup> Siyan na losani takuy piniliyan Apudyus, namatiyona chicha. Ad losanchay mamati, imfilangna chichà maid

fasurchan siya. Ad siyan mitapiyancha ta kachayawana.

*Na Ayat Apudyus An Chitau Mipakapun Jesu Cristu*

*Ef. 3:14-21*

<sup>31</sup> Siyan nu sachin iningwan Apudyus à para an chitau, sinu kon asintau ifaka nù? Tan nu siyan mamachang an chitau, maid pu makaafak an chitau nù! <sup>32</sup> Somsom-ontaù Apudyus, wi uray na mismuy anàna, foon pù inyachinan matayana à para an chitau ngim innadchonà matoy à subfutttau! Ad nu sachi, makaka lawa wi mangatod ta sinuman an chitau? Foon! <sup>33</sup> Ad maid mampafasur an chitauy piniliyan Apudyus, tan à Apudyus siyan mismuy nangifaka wi maid fasurtaun siya! <sup>34</sup> Siyan sinu kon manusan chitau nù? À Jesu Cristu nù? Foon, tan siyan natoy à para an chitau, ya ummuli nataku, ya awad ta sana ta machiwawan Apudyus ta machayawana wi mangitatachor an chitau! <sup>35</sup> Ad maid pu ko makaaan ta ayat Jesu Cristun chitau. Tan uray nu achun likattau ya maid pu achi mipachas à malifukan na somsomò, kakassiyann ayatnan chitau. Ad uray nu maparpalikatantau, ya uray nu makurangantaù maan ancha luput, ya uray sinumani kaam-amak wi màwan chitau, ya uray otyon chitau, achi pu mafaliwan na somsomò Jesu Cristun chitau. <sup>36</sup> Na niyug-is wi ukud Apudyus, anana,

“Kapu ta summurutannin sia,  
nasasagkanaani wi matoy,

tan isù namfalinon chianì pannilu wi ma-parti.”

<sup>37</sup> Ngim uray nu mapasamak losan chachi an chitau, mangaafaktau mipakapun Jesu Cristu wi mangay-ayat an chitau!

<sup>38</sup> Siyan sikurachuwà wi maid pu makaaan ta ayat Apudyus an chitau. Tan uray nu matoytau winnu matatakutau, ay-ayaton chitau. Ad maid pu anghel ya uray aran à makatipod ta ayatnan chitau. Ya uray sinuy mapasamak an chitau ta sana ya uray akò tapin na padcha, maid pu makaaan ta ayat Apudyus an chitau. <sup>39</sup> Tan uray sinuy mannakafalin wi awad ad langit ya awad ad charom na luta ya losani ingwana, maid pu makaaan ta ayat Apudyus an chitau mipakapun Aputauy Jesu Cristu.

## 9

### *Chachi Takuy Chinutukan Apudyus*

*Rom. 2:28-29; Gal. 4:21-31*

<sup>1</sup> Susunud, tuttuwa ya maid atuliyen na annay ifakà, kapu ta pammatì an Jesu Cristu. Ad akamun na Ispiritun Apudyus na somsomòu wi katuttuwaan na annay ifakà, <sup>2</sup> wi na ifakà, isag na sikab na somsomòu ya maid pu mapagpakan na sikabna, <sup>3</sup> kapu ta chachi asintatakù wi Judio! Tan nu mafalin kuma, uray saon na misina an Cristu ya machusa an Apudyus ta chichan masaragnifan. <sup>4</sup> Tan chichan mismuy kanà Israel wi chinutukan Apudyus à man-anàna ya chicha kon nangipail-ana ta kina-Apudyusna. Ya chicha kon nangiturakana ta chachi inturagna.



Ad chicha kon nangadchana ta Lintogna ya nangitudtuchuwana ta ustuy pinagchayawchan siya. Ya chicha kon nangipustaana ta chachi impustana. <sup>5</sup> Ya chicha kon kanà na chachi napatoki takun Apudyus ta awi. Ad chachi Judio kon niyanaan Jesu Cristu ta ummaliyanad asnay luta wi siyan Ap-apun na losan ya siya kò Apudyus wi machaychayaw à ing-ingkana! Amen.

<sup>6</sup> Achì pu anani payan yakay chachi losani impustan Apudyus ta awi an chiani wi Judio. Tan na katuttuwaana, foon à ifilang Apudyus losan na chachi kanà Israel à tuttuway takuna. <sup>7</sup> Isun Abraham, wi foon à ifilang Apudyus à ustuy takunan losani kanàna. Tan anan Apudyus an siya, “À anànuy Isaac siyan afusi lumoswaan na impustà à ustuy kanànu.” <sup>8</sup> Ad na piona ukuchon, foon pù an-ananà Apudyus na losani kanà Abraham. Tan na takuy ifilang Apudyus à ustuy an-ananàna, chichan niyanà à tumuttuwaan na sachi impustana. <sup>9</sup> Tan na impustan Apudyus an Abraham, anana, “Amasnay timpu na umaliyà à asini tawon, ad iyanà Sara wi asawam na anàuy larai.”

<sup>10</sup> Ad na osa koy mangiyalikà, chachi chuway anà Rebecca, wi chichan anà Aputauy Isaac. <sup>11-12</sup> Tan imfafagkan Apudyus an siya, “Nangatngatun uchichi nu panguru, siyan na panguru mansilfi ta sachi uchichi.” Na nangifagan Apudyus ta sachi, chaancha pù miyanà, siyan maìd pu kattò iningwachà mamfaru winnu lawing à namiliyan Apudyus à ay-ayatona. Ngim sachin iningwan Apudyus à mangipail-ana wi

foon à kapu ta iningwan na taku wi mamfaru winnu lawing na mamiliyanan chicha. Tan à Apudyus, piliyanan piona wi mipakapu kay ta somsomona. <sup>13</sup> Tan na osay niyug-is wi ukud Apudyus, anana, “À Jacob na inay-ayat-u ngim achì pu inay-ayat à Esau.”

<sup>14</sup> Siyan nu amaschi, siyan anantauy foon à nalimpiw à Apudyus tan annan laksikona? Foon, tan achi pu mafalini mifakan amasnat. <sup>15</sup> Tan imfakanan Moses ta awi, “Saoni Apudyus, ikad-uy mangachaku ya mangaasi ta sinumani piò.” <sup>16</sup> Ad siyan maila wi na mamiliyan Apudyus ta taku, foon pù siya kapunan pion na taku oyyoon, ngim kapu kay ta achakun Apudyus. <sup>17</sup> Isun na nàwa an Ali wi Faraon ta awi ad Egipto, tan imfakan Apudyus an siya, “Na nangwaà an sià man-ali, ta awad mangipail-à ta karobfongà ya ta mangipachamakà na kina-Apudyus-u ta ailili.” <sup>18</sup> Ad sachin mail-ana wi à Apudyus, achakuwanan sinumani pionay achakuwan, ya patangkinona kon somsomò na sinumani pionay patangkinon.

### *Na Og-ot Apudyus Ya Achakuna*

<sup>19</sup> Nu kaspangalikan awad makasongsongfat wi mangwanan an saon, “Siyan nu amasnat, achi pu kuma mafalini pafasuron Apudyus na takuy fumasur, tan maid pun met makasurn-gasing ta piona!” <sup>20</sup> Ngim achi pu ko kuma mafalini maukud na amaschi an Apudyus tan siyan nangwan chitau. Isun na fanga wi nachi-win, lilyonan nanchiwin nu tamako amaschin

inchidchiwinna? <sup>21</sup> Foon pun met, tan somsom-ontaun manchiwin à fanga, annan karobfon-ganay mangusar ta pita nu sinun piona, tan nu ananay chiwinonan kogwanà kusi ya kogwanà linga, insikun ta piona.

<sup>22</sup> Ad isuna kon iningwan Apudyus. Tan pionay mangipaila ta og-otna ya karobfongana wi manusa ta chachi mangipaog-ot an siya. Ngim uray nu amaschi, inan-anusana chicha uray nu machuchussacha. <sup>23</sup> Ad piona koy mangipaila ta kinachayawna wi maid pu miyisuwana, siyan in-achakuwana chachi takuy piniliyana wi mangila ta machayawana. <sup>24</sup> Ad chitaun piniliyana, wi foon pù afus na Judio tan uray na foon à Judio. <sup>25</sup> Tan na inyug-is Hosea ta awi, wi anan Apudyus,

“Na chachi foon pù takù ta chamu,  
chichan piliyà à mantakù ta sana.  
Siyan chachi foon pù inay-ayat-u ta chamu,  
chichan ay-ayatò ta sana.”

<sup>26</sup> Ya awad akon osay inyug-isna wi anana,  
“Ad na sachi mismuy lukar wi iningkaw na  
nangifaka wi  
foon pù takun Apudyus chicha,  
maawakanhà an-ananà Apudyus  
wi siyan natatakù ing-ingkana.”

<sup>27</sup> Ad na inyug-is Isaias mipangkop ta kanà Israel wi Judio, anana,  
“Uray nu ad-adchuwan na kanà Israel  
wi isun na kinaachun na kallis ta tarantag  
na fayfay,  
ààiyut yakan masarakhnifan an chicha.

28 Tan sikurachuy chumatong na padchay  
 mangikamakaman Apudyus wi manusa ta  
 losani takud asnay luta  
 wi maid milumidyuwana.”

29 Ad awad akon osay inyug-is Isaias wi anana,  
 “À Apudyus wi mannakafalin wi Ap-apun na  
 losan,  
 nu chinusana chitau losan wi Judio  
 wi foon pù inachakuwanan uchum,  
 nitapitau nachusa wi isun na chachi takud  
 Sodoma ya Gomorra.”

*Foon Pù Patiyon Na Chachi Judio Na Mam-  
 faruy Chamag*

30 Siyan na piò wi ifaka, na chachi foon pù  
 Judio wi maid pu namnamachà ifilang Apudyus  
 chichà maid fasurchan siya, nifilangchà mam-  
 faruy taku kapu ta namatiyanchan Jesu Cristu.

31 Ngim chachi Judio wi nangipapati wi nanurut  
 ta lintog à mangifilangan Apudyus an chichà  
 maid fasurchan siya, kakassiyang fasurcha. 32 Ad  
 tamako ta amaschi nù? Tan siya pinipiy-  
 yarchan manurutancha ta lintog à mangiflan-  
 gan Apudyus an chichà maid fasurchan siya wi  
 foon pù piniyarchà Jesu Cristu. Siyan nichong-  
 parcha ta fatu wi chochongparan na taku. 33 Tan  
 sachin ukuchon na niyug-is wi nangiyalig à Jesu  
 Cristu fatu, wi anana,

“Ilanyu, tan awad na iparoswà ad Sion wi iliyu  
 wi osay isù fatu.

Ad siyan michongparan na taku.

Ngim sinumani mamatin siya,  
 maid maamuyuwana tan masasallaknifan.”

## 10

<sup>1</sup> Susunud, maid uchum à iluwarù an Apudyus nu achi afus na masarahnifan chachi kailiyà wi Judio! <sup>2</sup> Tan tàchorà chicha wi kattò na maryachanchay manchaychayaw an Apudyus, ngim foon à ustuustun naawatancha. <sup>3</sup> Tan foon pù inakammuchan oyyoon Apudyus wi mangifilang ta takù mamfaru wi maid fasurchan siya, ad siya ipapaticha suruton na awachi simsimmòcha, ad achicha pun iyamfuruy ta puranun Apudyus. <sup>4</sup> Tan na katuttuwaana, pinagpag Jesu Cristu na miyusaran na sachi Lintog à mifilangan na takù mamfaru an siya, siyan na sana, sinumani mamatin siya, mifilanghà mamfaru wi maid fasurcha.

### *Maid Achi Pu Mafalin À Masarahnifan Ef. 2:1-10*

<sup>5</sup> Na inyug-is Moses mipangkop ta miyusaran na Lintog à mifilangan na takù mamfaru an Apudyus, anana, “Sinumani manurut ta losani lintog wi maid pu surngasingona, mafalini makafiyag an Apudyus.” <sup>6</sup> Ngim nu mipangkop ta mifilangan na takù mamfaru mipakapu ta pammatichan Jesu Cristu, foon à nalikat à màwa, tan foon pù masapur wi awad umoy ad langit mangipaalin Cristu ad asnay luta. <sup>7</sup> Ad foon pu kò masapur wi awad umoy ad charom na lutà mangipauli manaku an Cristu. <sup>8</sup> Tan na anan na niyug-is wi ukud Apudyus, foon à nalikat na masarahnifantau, tan chichingngor-taun nàwa, siyan akammutau ya mafalin akoy ug-ugkuchontau. Ad sachi kon ug-ugkuchontau

ta taku. <sup>9</sup> Tan nu ipudnuyu ifaka wi à Jesu na Ap-apu, ad nu patiyonyu ta somsomòyu wi siyan impaulin Apudyus tinaku, masarakhnifan-ayu. <sup>10</sup> Tan na mamatiyantaun Jesu Cristu siyan mangifilangan Apudyus an chitaù maid fasur-taun siya. Ad nu sachin ifagfakatau ta uchum, sachi kon masarakhnifantau ta kachusaantau. <sup>11</sup> Siyan tuttuwan niyug-is wi ukud Apudyus wi anana, “Sinumani mamatin Jesu Cristu, maid pu maamuyuwana.” <sup>12</sup> Ad na sanati naukud, mitapin losani taku tan maid pu laksikon Apudyus, siyan uray Judio winnu foon, maid pu nansafaliyancha tan à Jesu Cristun Ap-apun na losani taku ya siyan mangachaku fumafachang ta sinumani manchawat an siya. <sup>13</sup> Tan sachin anan na niyug-is wi ukud Apudyus wi anana, “Sinumani manchawat à fachang Jesu Cristu, masarakhnifan.”

<sup>14</sup> Ngim sinun in-inonchay manchawat à fachangna nu chaan cha pù mamati? Ad in-inoncha koy mamati nu maid pu chingchingn-gorchà mipangkop an siya? Ad in-inoncha koy mangngor nu maid pu umoy mangifaka? <sup>15</sup> Ad sinu kon umoy mangifaka nu maid pu mifaun? Tan na katuttuwaana, awad na finaun Apudyus, siyan tuttuwan sachi niyug-is wi ukudna, wi anana,

“Mamfaru ta annan umali  
mangifaka ta Mamfaruy Chamag!”

<sup>16</sup> Ngim na arwingana, ad-adchuwan na foon pù mamati ta Mamfaruy Chamag, isun na sachi inyug-is Isaias ta awi, wi anana,  
“Apudyus, isù maid pu mamati

ta sachi imfagfakani!”

17 Siyan maaawwatan wi maid uchum à marpuwan na mamatiyan na taku nu achi afus na mangngorancha ta ukud Apudyus, ya maid pu ko uchum à mipanggor nu achi afus na sachi chamag wi mipangkop an Cristu.

18 Ngim na imusò, tamako foon pù mamati chachi Judio nù? Chaancha pu chongron? Foon, tan chichingngorcha met, tan niyug-is na ukud Apudyus wi anana,

“Nifakan ukudna ta ailiili,  
siyan nanchinamag ta taku ta ailiili  
ingkana ta pagpag na luta.”

19 Siyan na sachi, foon pù naawatan na Judio na sachi chingngorcha? Sikurachuy naawatancha, tan uray na awi, iningkaw na inyug-is Moses, wi anana,

“Asikasuwò na chachi foon pù Judio  
wi foon pù ifilangyù takù ta umapos-ayu,  
ad achakuwà ako chicha,  
wi uray ait na akammucha mipangkop an  
saon,  
à umog-otanyu.”

20 Awad akon osay inyug-is Isaias wi sintumurod wi nangifaka ta sachi imfakan Apudyus mipangkop ta chachi foon pù Judio, wi anana,

“Inchasanà ta chachi takuy  
foon pù manganap an saon,  
ad uray nu maid nan-imusancha mipangkop an  
saon,  
finadngà na somsomòcha  
ta maawatanchan mipangkop an saon.”

21 Ngim nu mipangkop ta chachi Judio wi takun Apudyus, anana,  
 “Finikati uullayò na mansakunganchan saon,  
 uray nu achicha pu pumtog ya umiisìcha.”

## 11

### *Na Achakun Apudyus Ta Chachi Judio*

<sup>1</sup> Siyan kapu ta amaschin iningwan chachi Judio wi achicha pu mamati, awad nin mangwanani finay-anan Apudyus losan chachi sikuchi takuna. Ngim foon pun! Tan Judiowà met wi niyanà ta kanà Benjamin wi kanà Abraham.

<sup>2</sup> Ad foon pù finay-anan Apudyus na chachi piniliyana wi takuna ta awi. Tan iningkaw na namati, isun na sachi niyug-is wi nalliliyan Elias an Apudyus mipangkop ta chachi kailiyanay Judio, <sup>3</sup> wi anana,

“Apu, pinatoycha losan chachi profetasnu  
 ad chinachailcha ko losan na mipatayan  
 na michatun an sia.

Siyan na sana, os-osàanà à nafun-an  
 wi manayaw an sia,

ya uray ako saon, anaanaponchan matayà.”

<sup>4</sup> Ad annayan insongfat Apudyus an siya,

“Foon pù afus-à nafun-an, tan awad na  
 pitunlifuy illarasin-u wi foon pù manay-  
 chaw ta

sachi sinan-Apudyus wi Baal.”

<sup>5</sup> Amaschin nàwa ta awi, ad isun akon màwa ta sana, tan uray nu achi pu mamatin kaachuwan an chiani wi Judio, awad na sin-oosa wi namati wi chinutukan Apudyus kapu ta achakuna. <sup>6</sup> Na



nanutukanan chicha, foon à kapu ta nangwaan-cha ta mamfaru ngim kapu kay ta achakun Apudyus. Tan nu awad iningwachà mafalinchay machutukan, foon nù à liblin achakun Apudyus an chicha.

<sup>7</sup> Siyan, sinun maawatantau nù? Na maawatantau, na chachi kaachuwani Judio wi kanà Israel, foon à makàchascha ta sachi mamfaruwon Apudyus an chicha wi anaanaponcha. Tan afus na sin-oosan chichan nangchas wi chichan chinutukan Apudyus. Ngim chachi uchum, naam-amodchay achicha pu manchongor ta ifakan Apudyus. <sup>8</sup> Siyan tummuttuwan sachi niyug-is ta awi wi anana, “Impatangkin Apudyus na somsomòcha, ad ingkana ta sana, isù nakurapcha wi achicha pu makailasin ta ustu, ya isù naturongcha ko wi achicha pu makagngor ta mipangkop an siya.”

<sup>9</sup> Ad awad akon inyug-is David mipangkop ta chachi achi pu mamati, wi anana, “Sapay kuma ta chachi mallaragsakanchan masikapanchà machusaancha!

<sup>10</sup> Ya sapay kuma ta isuchà nakurap wi achicha pu makailasin ta katuttuwaan, ya sapay kuma ta mafuungcha ta likatchà ing-ingkana.”

<sup>11</sup> Siyan kapu ta amaschin iningwan chachi kailiyà wi Judio, awad nin mangwanan wi finayan Apudyus chichà ing-ingkana. Ngim foon pun, tan ilanyu, na achicha pu namatiyan, sachi kon nangadchan Apudyus ta wayayuy foon pù Judio

à mamati à maapsan kuma chachi Judio à mamatiyancha kuma ko. <sup>12</sup> Siyan na sachi foon pù namatiyan na chachi Judio wi fummasuranchan namfalini siyan fummaruwan na losani takud asnay luta, ad sinchumallu fumarun taku nu mamati ko chachi Judio an Apudyus!

*Na Masaraknifan Na Chachi Foon À Judio  
Ef. 2:11-22*

<sup>13</sup> Na sana, awad akon ifakà an chiayuy foon à Judio, wi saon na osay piniyar Apudyus à man-apostolesna wi manudtuchun chiayu. Ad ichayaw-un sachi iwaar wi nipiyan an saon, <sup>14</sup> ta umapos kuman uchumi kailiyà wi Judio ta mamaticha kumà masaraknifancha. <sup>15</sup> Tan ilanyu, na nangiwalinan Apudyus ta Judio, sachin nangakamichana ta uchumi taku ta ailiilì mamfurunna. Siyan maid pu miyisuwan na lagsak nu mangulinon Apudyus na Judio an siya, tan isun akon lagsak na natoy wi umuli mataku!

<sup>16</sup> Isun na tinapoy wi michatun an Apudyus, wi nu michatun na ummunay nautu, mitapi kon anchi uchum. Ya isun akon osay imong, tan nu Apudyus na ngin-uwa ta lamutna, kapilitani siya kon ngin-uwa ta pangana. <sup>17</sup> Na nàwa, isù sinoprà Apudyus na uchumi pangan na sachi imong wi immurana, wi chichan miyalikan na Judio, ad insuupnan safali wi panga wi miyalig à foon à Judio. Siyan na sana, kapu ta nisuup-ayu, makauwaayu ta losani afarun na sachi imong wi immuran Apudyus tan makauwaayu ta losani impustan Apudyus ancha Abraham ya chachi kanàna. <sup>18</sup> Ngim chiayuy nisuup,

masapur an-annachanyu ta achiyu amsiwon na chachi nasoprà, tan pangaayu kay wi foon à chiayun mamangchon ta lamut, tan na lamut siyan mamangchon an chiayu.

<sup>19</sup> Achiyu kuma anani, “Un-unnoy-ani nu chachi Judio,” ngim ananyuy, “Istay, nasopràcha ta awad misuupanni.” <sup>20</sup> Tuttuway nasopràcha tan achicha pu namati. Ad na nisuupanyu ko, kapu ta namatiyanyu. Ngim achiyu ipas-ar na sachi, ngim man-annad-ayu! <sup>21</sup> Tan ilanyu, maid kakan Apudyus wi manoprà ta sikuchi panga, ad sillumasun manopraanan chiayu! <sup>22</sup> Siyan amaschin mangil-antau ta kinaachakun Apudyus ya kinaistriktuna. Tan nu mipangkop ta chachi achi pu mamati, istriktu siya wi manguis. Ngim nu mipangkop an chitauy mamati, amod na kinaachakuna nu iturturuytaun pammatitau wi achitau pu man-awichan na achakuna. Tan nu man-awichantau, sopraon chitau ko. <sup>23</sup> Ad isun akon chachi Judio wi foon pù mamati, nu faliwanchan sachi achicha pu mamatiyan ta mamaticha ko, isuup Apudyus chicha, tan à Apudyus, mannakafalin wi mangisuup. <sup>24</sup> Tan nu mafalini aran chiayu wi isù pangan na imongi safali, ad insuupna chiayu ta sachi ustuy murana, sillumasun mangisuupana ta Judio wi sikud wi pangana.

*Umachakù Apudyus Ta Losani Taku*

*Ef. 3:1-13*

<sup>25</sup> Chiayuy susunud wi foon pù Judio, annan piò wi ipaakammun chiayu wi chaan pù mi-paakammu ta taku, ta achiyu kuma ipas-ar anani

napatpatog-ayu nu Judio. Siyan maawatanyu kuma wi foon à manakus na kinatangkin na som-somò na uchumi kailiyà wi kanà Israel ta achicha mamatiyan, tan ingkana kà makumplitun filang na foon à Judio wi mamati. <sup>26</sup> Ad sachi kon timpuy mamatiyan na losani Judio wi kanà Israel à masarahnifancha. Tan na niyug-is wi ukud Apudyus, anana,

“Chumatong na Sumarahnib wi marpud Sion,  
ad charusanan losani kinarawing na Judio  
wi kanà Jacob.

<sup>27</sup> Ad na sachi timpu, pakawanò na fasurchà tumuttuwaan na impustà an chicha.”

<sup>28</sup> Kapu ta foon à namatin Judio ta Mamfaruy Chamag mipangkop an Jesu Cristu, isù afusur Apudyus chichà fumaruwanyuy foon à Judio. Ngim kapu ta chinutukan Apudyus na aappucha ta awi, patkana ko kay chicha. <sup>29</sup> Tan à Apudyus, achi pu mafalini faliwanan som-somòna mipangkop ta takuy nar-usna chinutukan ya fininchisyunan. <sup>30</sup> Chiayuy foon à Judio, foon pù namatiayun Apudyus ta chamu. Ngim na sana, chiayun inachakuwan Apudyus kapu ta achin pun na Judio namatiyan. <sup>31</sup> Ad isun akon sachi màwa ta Judio, tan uray foon pù mamaticha ta sana kapu ta nangachakuwan Apudyus an chiayu, chumatong na padchay mangachakuwan Apudyus akon chichà mamatiyan. <sup>32</sup> Amaschin iningwan Apudyus ta awad mipail-an na kafasuran na losani taku ta awad mangipail-ana ta achakuna ta losani taku.

*Na Machayawan Apudyus*

<sup>33</sup> Kattoi naschaawà wi mammammò ta kinaraing Apudyus wi maid miyisuwana, tan maid achina akammu ya maid achina maawatan! Maid makaisuplikar ta simsimmòna! Ya maid pu ko makaawat ta ukalina! <sup>34</sup> Isun na niyug-is wi ukud Apudyus wi anana,

“Maid pu takù mangakammu ta somsomò Apudyus.

Siyana maid pu makatudtuchun siya.

<sup>35</sup> Ad maid pu nangatod an siyà farangnà sufalitana.”

<sup>36</sup> Tan à Apudyus, siyana nangwa ta asinchuwan ya siya kon mangayyuwan ta losan, wi na puntusna, machayawana. Siyana chaychayawontau siyà ing-ingkana! Amen.

## 12

### *Na Oyyoon Wi Mansilfi An Apudyus*

*1 Cor. 12:4, 12; Ef. 4:1-16; 1 Tes. 5:12-22*

<sup>1</sup> Siyana, susunud, kapu ta amochi achakun Apudyus an chitau, masapur adchontaun long-agtau à natattakuy chatun an Apudyus wi mansilfin siya, ta machachallusantaui mangwa ta sinumani pion, tan sachin ustuy oyyoontau wi manayaw an siya. <sup>2</sup> Achitau pu turachon na oy-oyoon na achi pu mamati, ta na oyyoontau, iparufustaui Apudyus à mamaliw ta somsomòtau fumaruwana. Tan nu sachin oyyoona, maawatantaun pion Apudyus an chitau, ya losan akoy mamfaruwona ya sinumani mamparagsak an siya.

<sup>3</sup> Ad kapu ta piniyarà an Apudyus à mantudtuchu, annayan ifakà an chiayu losan: Masapur wi waschi osa achina pu pangatuwon na long-agna ta somsomòna, ngim masapur ammana somsom-on na isun na karobfongana wi innadchon Apudyus an siya kapu ta namatiyana. <sup>4</sup> Iyalig-un long-ag na taku. Tan uray nu osan long-ag, achun partinay nangkarakarasi wi foon pù man-iisun mausarancha. <sup>5</sup> Isuna kon chitauy mamati, tan uray achutau, ososàntau wi long-ag Cristu, ad nansùsuuptau losan uray nangkarakarasi. <sup>6</sup> Ad kapu ta fachang Apudyus an chitau, nangkarakarasin innadchonay karobfongantau, siyan masapur wi waschi osa usaronan naatod an siyà patingkan na karobfongana. Isun na naadchan à karobfongan wi mangipaakammu ta imfakan Apudyus, masapur iyamfuruyna ta sachi pinatina. <sup>7</sup> Ad na naadchan à karobfongan wi mansilfi ta uchum, masapur ipapatinay mangwa. Ad na mantudtuchu, masapur farfaruwonay mantudtuchu. <sup>8</sup> Nu siya naatod na karobfongan wi mansorkag à pumigsaan na pammatin na uchum, masapur siyan oyyoona. Ad nu awad innadchon Apudyus à karobfonganay fumachang, masapur manchara. Ad na naadchan à karobfongan wi mangayyuwan ta mamati, masapur ipapatinay mangwa. Ad na mansayaaw ta chachi malikatan, masapur naragsak wi mangwa.

<sup>9</sup> Masapur ituttuwataun ayattau ta fufuruntau wi foon à afus na tupò à man-ug-ugkud. Ya masapur akoy man-awichantaun sinumani

lawing ta siya kay somsom-ontaun mamfaru. <sup>10</sup> Masapur man-asiay-ayattaù isun na mangay-ayatan ta mismuy sunud, ya man-asilispitatau koy mamfufurun. <sup>11</sup> Achitau pu ko masachut wi mangwa ta uray sinuman, sinchumallun mansilfiyantaun Apu Jesu Cristu. <sup>12</sup> Na namamatau siya kuman mamparagsak an chitau. Ya masapur an-anusantaun losani likattau, ya ipapatitauy malluwaru. <sup>13</sup> Ad nu awad ako takun Apudyus à makasapur à fachang, masapur fadngantau. Ya achitau pu kuma mas-à wi mammangili ta farangnay taku.

<sup>14</sup> Nu awad mangwà malikatantau, achitau pu arwakan ngim chawatontaun Apudyus ta finchisyunanà siya. <sup>15</sup> Makaragsaktau ta chachi naragsak, ya makasauytau ko ta chachi mansasàuy. <sup>16</sup> Makatimpuyugtau ko ta losani taku, ya achitau pu ipangatun long-agtau, ngim mampafatau. Ya achitau pu asigsikuru wi isù akammutaun losan.

<sup>17</sup> Nu kaspangalikan awad nangwà lawing an chitau, achitau pu ifaros à lawing. Ipatitau oyyoon na sinumani mamfaruwon na losani taku. <sup>18</sup> Pachasontau ta patingkan na karob-fongantau wi makatimpuyug ta losani taku. <sup>19</sup> Susunud, uray sinuy oyyoonchan chiayu, achia-ayu fumaros ngim ipiyaryun Apudyus ta siyan mangifaros. Tan sachin niyug-is ta ukudna, wi anana,

“Saon na nginfiyang ta faros,  
siyan saoni Apudyus na mangifaros.”

<sup>20</sup> Na oyyoontau, turachontaun sachi niyug-is wi ukudna, wi anana,

“Nu nafitil na afusuryu, paananyù siya,  
 ad nu nauwaw, painumanyu.  
 Tan nu amaschin oyyoonyu,  
 siyan mafainan ta iningwana.”

<sup>21</sup> Siyan ilantau ta achitau maafak ta lawing, tan na oyyoontau kuma, afakontaun lawing.

## 13

### *Masapur Patkontaun Turay Na Kufilnu Tito 3:1; 1 Ped. 2:13-17*

<sup>1</sup> Losani taku, masapur patkonchan kufilnu wi mangituray an chicha tan Apudyus na nangatod ta karobfonganchay manturay. Siyan maid pu manturay ad asnay luta nu foon à Apudyus na nangipiyar an chichà manturayan-cha. <sup>2</sup> Siyan sinumani sumurngasing ta manturay, sumurngasing ako ta filin Apudyus, ad siyan machusaana. <sup>3</sup> Foon à ogyatantaun manturay nu oyyoontaun ustu, ngim afus na mangwà lawing à umogyat an chicha. Siyan ta maid umogyatanyu ta manturay, siya kay oyyoonyun ustu, wi sachi kon manayawanchan chiayu. <sup>4</sup> Tan na turay, chichan isù mansilfin Apudyus à fumaruwanyu. Ngim nu lawing na oyyoonyu, sachin umogyatanyu tan awad na karobfongancha wi manusan chiayu, tan mansilfichan Apudyus à manusa ta sinumani mangwà lawing. <sup>5</sup> Siyan masapur patkontau chachi turay à mangilisiyantau ta chusan Apudyus, ya siya kon ustuy oyyoontauy mamati.

<sup>6</sup> Siyan sachi kon mamayachantau ta fukistau, tan masapur awad suwilchuwon na chachi turay



wi mansilfin Apudyus ta mangayyuwananchan chitau. <sup>7</sup> Siyan fayachanyun sinumani illintog na kufilnu wi fayachanyuy fukis ancha sinumani nilintog wi mafayachan. Ad masapur lispituwonyun losani karobfonganchay malispitu.

*Na Oyyoontauy Mamfufurun*

*Luc. 10:29-37; Gal. 5:14; 1 Tes. 5:5-8*

<sup>8</sup> Masapur fayachantaun losani utangtau ta marpas wi achitau iyawniawni, ta afus yakan utangtauy achi pu marpas wi siyan man-asiay-ayatantauy mamfufurun. Tan na takuy mangay-ayat ta furunna, siya tungparonan losani Lintog. <sup>9</sup> Tan ilanyu, nu tungparontaun sachi osay lintog wi anana, “Masapur ay-ayatom na furunnù isun na mangay-ayatam ta long-agnu,” mitapi losan na uchumi lintog wi isun chachi lintog wi anancha, “Achia managchakas; achia pumatoy à taku; achia man-akaw; ya achia mangkamkam à uwan na uchum.” <sup>10</sup> Tan nu awad tuttuway ayatnu ta furunnu, achi pu mafalini oyyoom na lawing an siya. Siyan na mangay-ayatantau ta furuntau, sachin manungparantau ta losani Lintog.

<sup>11</sup> Masapur wi amaschin inyòoyyayu, tan akammutau wi tuttuway chanchanin mangulinan Jesu Cristu wi mangaran chitau, tan adachani ta sana nu sachi wi namatiyantau. Siyan imanmanyuy mangwa ta losani piona. Masapur isuayù fummafangon wi nasusuyuop. <sup>12</sup> Tan tuttuway chanchani marpas na annay isù lafi wi fulingotan ta somsomò na taku kapu ta fasur. Ya chanchanin pumadchaana wi mangulinan Jesu Cristu. Siyan iyakaytaun losani lawing wi isù

pangot, ta siya iyarmastaun mamfaru wi mausar ta padcha. <sup>13</sup> Imanmantau wi mangwa ta ustu wi miyamfuruy ta oy-oyyoon na takuy narawakan na somsomòcha. Siyan achi pu kuma mafalin wi mansallisallimong, ya achi pu ko mafalin wi managchakas ya mangwà linuruku ancha mangkukura ya man-ap-apos. <sup>14</sup> Ngim na oyyoontau kuma, turachontaun inyòoyyan Apu Jesu Cristu ya achitau pu parufusan na annay long-agtau wi mangwa ta uray sinuy pionay lawing.

## 14

### *Achita Chillawon Na Furunta*

*1 Cor. 8:1-13; 10:23-30; Col. 2:16-17*

<sup>1</sup> Masapur ifilangtaù furuntaun sinumani nakapsut na pammatina. Ya achitau pu ision à siya mipangkop ta maawatana, uray nu safalin maawatanyu. <sup>2</sup> Isun na taku wi, kapu ta kinakapsut na pammatina, afus yakan tipoy à anona wi lawingonan ischa. Ngim na pammatin na uchum, mafalini anonchan farangnay maan. <sup>3</sup> Siyan chiayuy mangan ta farangnay maan, achiyu chillawon na mallawing ta uchumi maan. Ad uray chiayuy mallawing ta uchumi maan, achiyu ko chillawon na mangan à farangna, tan inakseptar Apudyus chiayu losan. <sup>4</sup> Tan sinua man wi manguis ta sanilun na uchum? Na katutuwaan, sanilun Apudyus chitau losan! Siyan ikad na nginsanilu wi manguis nu ustu winnu foon na oyyoon na waschi osay saniluna. Ad waschi osa, fadngan Apu Jesu Cristu à makàwa ta piona.

<sup>5</sup> Nu kaspangalikan awad osà patkanan uchumi padcha nu uchum. Ngim na uchum, man-iisuwonchan apadchapadchà maid osà napatpatog. Siyan masapur waschi osa mapnok na somsomòna nu sinun surutona. <sup>6</sup> Tan na mamatog ta osay padcha, oyyoonà manayawanan Apu Jesu Cristu. Ya isuna kon mangan à farangnay maan, anonà manayawanan Apu Jesu Cristu ad iyamanna losan an Apudyus. Ad uray akon mallawing ta uchumi maan, na pangkopna ko, manayawanan Apu Jesu Cristu wi iyamanna kon Apudyus na mafalini anona.

<sup>7</sup> An chitauy mamati, maid osà fumukud mangwa ta mafiyakana ya uray akon matayana. <sup>8</sup> Tan na pangkop na annay mafiyakantau siyan machayawan Apu Jesu Cristu, isun akon matayantau, tan machayawana ko. Siyan uray nu matatakutau winnu matoytau, maid uchum à pangkop losan chachi nu achi afus na machayawan Apu Jesu Cristu wi siyan ngin-uwang chitau. <sup>9</sup> Tan sachin pangkopnay natoy ya ummuli nataku, ta siyan man-apun na asifiyyag ya uray na natoy.

<sup>10</sup> Siyan nu Jesu Cristun Aputau losan, maid pu karobfongantau wi manguis ya mangamsiw ta fufuruntau. Tan maid pu osan chitau achi pu mipasangu makuis an Apudyus. <sup>11</sup> Tan na niyugis wi ukudna, anana,

“Saoni Apudyus wi nafifiyyag,  
na ifakà, maid pu taku achi pu mampalintumong  
ta sangwanà à mangipudnu  
ta kina-Apudyus-u à machayawà.”

<sup>12</sup> Siyan maaawwatan wi losani taku, mipasanguchan Apudyus à manongfatancha ta losani iningwacha ta nafiyakanchad asnay luta.

*Achitau Lifukon Na Pammatin Na Furuntau*

*1 Cor: 8:9-13*

<sup>13</sup> Siyan masapur iyakaytau wi mangkinnuis, ya an-annachantau ta achitau pu oyyoon na fumasuran na furuntau. <sup>14</sup> An saon, napnokà, wi à Apu Jesus na manikurachu ta somsomòu wi mafalini maan na farangnay maan wi maid pu paniyawon Apudyus. Ngim sinumani takuy paniyawonan uchumi maan ta somsomòna, siyan tuttuway paniyaw an siya. <sup>15</sup> Siyan chiayuy mangan à farangna, ilanyu ta foon pù malifukan na pammatin na furunyun mangananyu, tan nu amaschin oyyoonyu, ipailayu wi maid pu ustù ayatyun siya. Siyan ilanyu ta foon pù sachi maan wi anonyun manlifuk ta pammatin na furunyu, wi osa koy inyatoy Jesu Cristu na fasurna! <sup>16</sup> Ad nu awad oyyoonyù mamfaruwonyu, ngim lawing ta atan na fufurunyu, iyakayyu ta maid pu maamsiwan na mamfaruy oyyoonyu. <sup>17</sup> Tan na Manturayan Apudyus an chitau, foon à napatog na maan ya mainum, ngim na napatog, siyan mifilangantaù maid pu fasurtaun Apudyus, ya makatimpuyukantau ta uchum, ya lagsak wi adchon na Ispiritun Apudyus. <sup>18</sup> Ad nu amaschin patkantau ta sanay mansilfiyantaun Cristu, siya iparagsaktaù Apudyus ya lispituwon chitau ko ta asintatakutau.

<sup>19</sup> Siyan ipapatitauy mangwa ta sinumani mampatimpuyug an chitau ya sinumani mam-

papigsa ta pammatin na uchum. <sup>20</sup> An-annachantau ta achitau chachailon na iwaar Apudyus kapu kay ta maan. Losani karasin na maan, mafalini maan. Ngim lawing nu siyan fumasuran na furun na manganan. <sup>21</sup> Siyan na oyyoontau kuma, achitau pu mangwà sinu-mani manlifuk ta pammatin na furuntau, uray na manganan à ischa ya uminuman à fayas ya sinumani amaschi nu sachin malifukan na pammatina. <sup>22</sup> Tan uray nu maawatantau wi maid pu arwingan na amaschi, ikinòtau kay ta nangamung yakà Apudyus. Tan kattoi maragsak na takuy foon à pafasuronan long-agna kapu ta iningwanay akammunay mamfaru! <sup>23</sup> Ngim nu awad chuwachuwau na somsomòna mipangkop ta kinaustun na manganana ta anona, fasurnachi nu ipapilitna wi mangan, tan foon à surutonan patiyona. Tan tuttuwa wi uray sinuy oyyoon, nu manchuwachuwatau mipangkop ta kinaustuna, fasur nu oyyoontau.

## 15

*Somsom-ontau Na Mafadngan Na Uchum, Wi Foon Pù Afus Na Long-agtau*

*Gal. 6:1-5*

<sup>1</sup> Chitauy napigsan pammatina, masapur fadngantaun chachi nakapsut na pammatica wi isù makafuudtau ta fuudcha, wi foon pù afus na fumaruwan na long-agtau somsom-ontau.

<sup>2</sup> Somsom-ontau kuman fumaruwan na fufuruntau ta awad pumigsaan akon pammatica.

<sup>3</sup> Tan à Jesu Cristu, foon pù afus na long-agnà

simsimmòna, tan sachin anan na niyug-is wi ukud Apudyus, wi anana,  
 “Losani insurtu wi inukud na takun sia,  
 saon na umayana.”

<sup>4</sup> Losani niyug-is wi ukud Apudyus, niyug-ischa losan à matudtuchuwantau ya masorkakan na somsomòtau wi manganus ta sinuy mapasamak an chitau à pumigsaan na namnamataun siya.

<sup>5</sup> Ad na chawat-un Apudyus wi marpuwan na anus ya manorkag ta somsomò, adchonan chiayun mantitimpuyukanyu ta turachonyun iningwan Aputauy Jesu Cristu, <sup>6</sup> ta man-os-ossaantauy manayaw an Apudyus wi Aman na Aputauy Jesu Cristu.

### *Na Mitapiyan Chachi Foon À Judio*

<sup>7</sup> Siyan man-asiflang-ayù isun na nangiflangan Cristu an chiayu, tan sachin machayawan Apudyus. <sup>8</sup> Tan na ummaliyan Cristu ad asnay luta, ummali mansilfi ta Judio à mangil-ancha ta kinapiyar Apudyus wi mangwa ta losani impustana ta aappucha ta awi. <sup>9</sup> Ad foon pu kò afuschi, tan ummali masaraknifan na chachi foon à Judio à manayawancha kon Apudyus kapu ta achakuna. Ad sachin niyug-is wi ukud Apudyus, wi anana,

“Siyan chayawò siay Apudyus,  
 ya uray na foon à Judio  
 makachayawcha kon sia.

Ad ikankantanin chayawnin sia.”

<sup>10</sup> Ya awad akon osay niyug-is, wi anana,  
 “Chiayuy foon à Judio, makaragragsak-ayu ko ta chachi takun Apudyus!”

<sup>11</sup> Ad na osa, anana ko,

“Chiayuy foon à Judio,  
     chayawonyu losan à Apudyus,  
     ta chayawon akon losani takù siya!”

<sup>12</sup> Ya awad akon inyug-is Isaias, wi anana,

“Chumatong na osay kanà Jesse,  
     wi umali manturay ta chachi foon à Judio.  
     Ad siyan namnamaonchà mangisaraknib an  
     chicha.”

<sup>13</sup> Na chawatò an Apudyus wi narpuwan na namnamatau, ta iparagsaknà chiayu ya patarnaona kon somsomòyu kapu ta pammatiyu, ya ta pumigsapigsa kon namnamayun siya kapu ta karobfongan na Ispirituna wi fumachang an chiayu.

*Na Puntus Pablo Wi Mantudtuchù Amaschi  
 2 Cor. 10:15-16*

<sup>14</sup> Susunud, tuttuway mapnokà ta mipangkop ta pammatiyu, tan akammù wi nalimpiw na oy-oyyoonyu ya achu kon naawatanyu wi tudtuchun Apudyus ya mafalin akoy man-asitudtuchuayu. <sup>15</sup> Ngim achifali tan natur-ochà wi mangisurat ta anchanayay uchumi in-tudtuchù an chiayu, tan uray nu akammuyu, asin-u impasasmò an chiayu ta achiyu mali-watan. Ya naturochà wi mantudtuchun chiayu, tan siyan impiyar Apudyus an saon, <sup>16</sup> wi mansilfin Jesu Cristu à mafadngan na losani foon à Judio. Tan itudtuchù an chiayuy foon à Judio na Mamfaruy Chamag wi narpun Apudyus à mi-tapiyanyu. Siyan isuwà à pachi wi mangichatun an chiayun Apudyus. Ad akseptaron ako

Apudyus chiayu tan naapudyusan-ayu kapu ta Ispirituna wi awad an chiayu.

<sup>17</sup> Ad kapu ta nitimpuyukà an Jesu Cristu, siyan mafalini ichayaw-un losani nansilfiyà an Apudyus. <sup>18</sup> Ngim maid uchum à ug-ugkuchò nu achi afus na chachi iningwan Cristu ta nangusaranan saon à mamatiyan na chachi foon à Judio an Apudyus. Tan na namatiyancha, kapu ta nangitudtuchuwà ya ining-ingwà, <sup>19</sup> wi finadnganà ta karobfongan na Ispiritun Apudyus wi mangwà kaskaschaaw ya chachi mampataag ta taku. Siyan nanipud ad Jerusalem ya ingkanad Ilirico, ninarmà wi nangitudtuchu ta losani Mamfaruy Chamag mipangkop an Cristu ta losani taku. <sup>20</sup> Tan na mamiyaà wi umoy ta ilili mangitudtuchu ta Mamfaruy Chamag ta takuy chaan pù mangngor ta mipangkop an Cristu, ta achì pu kotapan na iningwan na uchum. <sup>21</sup> Tan na niyug-is wi ukud Apudyus, anana, “Chachi foon pù natudtuchuan ta mipangkop an siya, chongroncha.

Uray maid pu akammucha mipangkop an siya, maawatancha.”

### *Na Puranun Pablo Wi Umoy Ad Roma*

<sup>22</sup> Siyan, susunud, sachin mataktataktakà wi umali an chiayud asnat. <sup>23</sup> Ngim na sana, limpas-un iwaar-u ta anchanayay ili. Siyan kapu ta amannay tawoni naparafas piò wi umali mangilan chiayud asnat, <sup>24</sup> na sanay umayà ad España, simsimmòuy manchakas ad asnati Roma ta makafurfurunà yan an chiayù ait ta mat-opà, ad



ipaligwatà an chiayu wi mangituruy umoy ad España. <sup>25</sup> Ngim na sana, inyà umunad Jerusalem iyoy na annayay fachang wi para ta chachi takun Apudyus ad aschi. <sup>26</sup> Tan na anchanayay mamatid asnay provinsiya wi Macedonia ya Acaya, simsimòcha wi mangatod à fachangcha ta kakapus wi takun Apudyus ad Jerusalem wi makasapur à fachang. <sup>27</sup> Somsomòcha kan nangwaancha ta sachi, ngim na katuttuwaana karobfongancha wi mamachang ta chachi Judio tan maid uchum à nangngoran na chachi foon à Judio ta mipangkop an Apudyus nu achi afus na Judio. Ad na sana, sumufalitcha wi fumachang ta kasapuran na Judio. <sup>28</sup> Siyan nu marpas-u ipurang an chichan annayay naurnung, manchakasà ad asnat ta umayà ad España. <sup>29</sup> Ad sikurachuwò wi nu umaliyà ad asnat, lumagsaktau losan mipakapun Cristu.

<sup>30</sup> Siyan, susunud, annan chawatò an chiayu, ad akammù wi chongronyu tan os-osàan na somsomòtaun Aputauy Jesu Cristu ya man-asiay-ayattau losan kapu ta Ispiritun Apudyus. Na chawatò, losantau kuma à saon iluwaruwan an Apudyus. <sup>31</sup> Iluwaruyu wi ayyuwananà an Apudyus ta achiyà an-anuwon ta chachi Judio ad Judea wi foon pù mamati. Ya chawatonyu ko, ta chachi takun Apudyus ad Jerusalem, ta akseptaroncha kuman annayay fachang wi narpu ta chachi foon pù Judio. <sup>32</sup> Siyan isakà maragsakan wi umalid asnat nu iparufus Apudyus, ta mailongan akon somsomòu. <sup>33</sup> Sapay kuma ta iingkaw à Apudyus an chitau losan, wi siyan

narpuwan na tarnatau. Amen.

## 16

### *Na Nampakumustaan Pablo Ta Uchum*

<sup>1</sup> Na sunudtauy fufai wi Febe wi umalid asnat, siyan osay mamachafachang ta chachi maamuamung wi mamati ad Cencrea. <sup>2</sup> Ipailayun ay-ayyun siya mipakapu ta pammatiyun Apu Jesus wi amaschin ustuy oyyoon na takun Apudyus. Ad na losani kasapurana, fadnganyu kuma tan achun takuy finadngana, ad uray akò saon finadnganà an siya.

<sup>3</sup> Pakumustaonyu cha Akila an Priscila wi man-asawa, wi chichan fufurun-uy mansilfin Jesu Cristu. <sup>4</sup> À chicha, tikangaycha iyatoy na nanarakhifanchan saon, siyan manyamanà an Apudyus mipakapun chicha. Ya uray ako chachi foon à Judio wi mamati wi maamuamung, losancha ko manyaman an Apudyus mipakapun chicha. <sup>5</sup> Ya pakumustaonyu ko chachi mamati wi maamuamung ta foroycha.

Pakumustaonyu kon sachi furun-uy Epeneto, wi siyan ummunay namatin Cristu ta provinsiya wi Asia. <sup>6</sup> Ya itapiyu kò Maria wi nangipapati wi man-iwaar à para an chiayu. <sup>7</sup> Ya itapiyu ko cha Andronica an Junia wi kailiyà wi Judio wi nafarud ako ta nafaruchà ta sin-arkawan. À chicha, ummunachay namati nu saon, ya lispituwon na losani apostoles chicha.

<sup>8</sup> Pakumustaonyu kon sachi furun-uy Ampliato wi ay-ayatò mipakapun Apu Jesus. <sup>9</sup> Ya uray akò Urbano wi osay furunni ko wi mansilfin

Cristu, ya Estakis ako wi osay ay-ayató. <sup>10</sup> Ya itapiyu kò Apeles wi napalikatan à nail-an na katuttuwaan na pammatinan Cristu. Ya itapiyu kon losani faryan Arestobulo, <sup>11</sup> ya à Herodion wi osay kailiyà wi Judio, ya chachi mamati wi faryan Narciso.

<sup>12</sup> Pakumustaonyu ko cha Trifena an Trifosa wi mansilfi kon Apu Jesus, ya à Persido wi furun-u wi mangipapati wi mansilfin Apudyus. <sup>13</sup> Pakumustaonyu kò Rufo, wi machamchamag na mansilfiyanan Jesu Cristu, ya à inana wi isun ako inà. <sup>14</sup> Ya itapiyu ko cha Asincrito, Fle-gonte, Hermes, Patróbas, Hermas ya losan chachi susunudtau wi makaamuamung an chicha. <sup>15</sup> Ya pakumustaonyu ko cha Filologo an Julia, cha Nereo ya sunudnay fufai, ya à Olimpás, ya chachi koy losani takun Apudyus wi awad na chicha.

<sup>16</sup> Waschi osan chiayu, ipailana kuman ayatna ta fufurunna nu maamung-ayu. Losani mamatin Cristu wi maamuamung ta ailiili, losancha paku-mustaon chiayud asnat.

### *Na Anungus Na Intudtuchun Pablo*

*Gal. 1:8-9; 1 Tim. 6:3-5; Tito 3:10*

<sup>17</sup> Susunud, anna kon ifakà an chiayu: tatan-chaananyu chachi takuy manyam-an ta timpuyugyu ya manlifuk ta pammatin na uchum. Tan surngasingonchan katuttuwaan wi nitudtuchun chiayu wi safalin itudtuchucha. Siyan masapur achiayu makafurfurun an chicha! <sup>18</sup> Tan na amaschi wi taku, foon à Aputauy Jesu Cristu na mansilfiyancha ngim afus yakan pipion na long-agchà anaanaponcha. Ad kapu ta kinasikapcha,

achun awisoncha turtulliyani kurang na som-somòcha.

<sup>19</sup> Naragsakà mipakapun chiayu tan nanchinamag na nangipapatiyanyu ta pammatiyu. Ngim anna kon piò an chiayu, ta lumailaing-ayu wi mangwa ta mamfaru ya maid pu somsomòyù mangwà lawing. <sup>20</sup> Tan nu amaschi, foon à mafayag ad à Apudyus wi narpuwan na tarnan na somsomòtau, fadngan chitau wi mangafak an Satan, tan isù kuschantaù siya.

Sapay kuma ta fadngan chiayu losan an Aputauy Jesu Cristu.

<sup>21</sup> À Timoteo wi makaiwaar an saon ta annay mansilfiyannin Jesu Cristu, pakumustaona ko chiayu, wi isun akon anchanayay kailiyà wi Judio wi cha Lucio an Jason ya Sosipatro.

<sup>22</sup> (À saoni Tercio wi mangiyug-is ta annayay surat Pablo, pakumustaò ako chiayuy mamatin Aputauy Jesu Cristu.)

<sup>23</sup> À Gayo wi mammangilin saon, wi annayay foroyna kon maamuamungan na losani mamatid asna, pakumustaona chiayu. Ad à Erasto wi tuserero na annayay ili, ya à Cuarto wi sunudtau ko, pakumustaoncha chiayu.

<sup>24</sup> Sapay kuma ta fadngan chiayu losan an Aputauy Jesu Cristu. Amen.

### *Machayaw À Apudyus*

#### *Juda 24-25*

<sup>25</sup> Chaychayawontaù Apudyus! Annan mannakafalinnay mampapigsa ta pammatiyù miyamfuruyana ta Mamfaruy Chamag mipangkop an Jesu Cristu wi intudtuchù. Na

sachi chamag, wi nitataru nanipud ta awi, sana kan mipaakammuwana. <sup>26</sup> Ngim ta sana, nipaakammu ta ailiili tan inyug-is chachi profetas ta awi, tan à Apudyus wi iniingkaw à ing-ingkana, siyan nangifilin à mifag-anà mamatiyan na taku ta ailiili.

<sup>27</sup> Ta à Apudyus wi araiangan ta losan, machay-chayaw à siyà ing-ingkana mipakapun Jesu Cristu! Amen.

**Na ukud Apudyus**  
**Kalinga, Southern: Na ukud Apudyus New Testament**  
copyright © 1986 Wycliffe Bible Translators, Inc.

Language: Kalinga, Southern

Contributor: Wycliffe Bible Translators, Inc.

All rights reserved.

2020-11-30

---

PDF generated using Haiola and XeLaTeX on 21 Apr 2023 from source  
files dated 29 Jan 2022  
14356fa9-7e1b-5386-9d16-f8048ccafddd